

تفسير سورة الرعد

لسيدنا يوسف بن المسيح
عليه الصلاة والسلام

إعداد وتقديم الخادم يوشع بن نون 2021



درس القرآن و تفسير الوجه الأول من الرعد .

أسماء إبراهيم :

شرح لنا سيدي و حبيبي يوسف بن المسيح ﷺ أثناء جلسة التلاوة المباركة من أحكام التلاوة ؛ من أحكام المد , ثم قام بقراءة الوجه الأول من أوجه سورة الرعد ، و أجاب على أسئلتنا بهذا الوجه ، و أنهى نبي الله الحبيب الجلسة بأن صحح لنا تلاوتنا .

بدأ نبي الله جلسة التلاوة المباركة بقوله :

الحمد لله ، الحمد لله وحده ، الحمد لله وحده و الصلاة و السلام على محمد و من تبعه من أنبياء عهده و بعد ، لدينا اليوم الوجه الأول من سورة الرعد ، و نبدأ بأحكام التلاوة و مروان :

مد فرعي بسبب السكون :

مد عارض للسكون و يكون غالباً في نهايات الآيات و يمد بمقدار ٤ إلى ٥ حركات .
و مد لازم حرفي أو كلمي : الحرفي هو في أوائل السور , و الكلمي مثقل و يُمد بمقدار ٧ حركات مثل (و لا الضالين) .
و المد الحرفي له ثلاثة أنواع : حرف واحد يمد حركة واحدة و هو الألف في حروف المقطعات في بداية السور ، مجموعة من الحروف تمد بمقدار حركتين و هي مجموعة في جملة (حي ظهر) , و حرف تمد بمقدار ٦ حركات و هي مجموعة في جملة (نقص عسلكم) .

و بعد مروان قالت الأحكام رفيدة ثم أرسلان .

و ثم تابع نبي الله يوسف الثاني ﷺ الجلسة بشرح الوجه لنا فقال :

{بسم الله الرحمن الرحيم}

{المر تلك آيات الكتاب والذي أنزل إليك من ربك الحق ولكن أكثر الناس لا يؤمنون}
:

هذا الوجه العظيم من السورة العظيمة ، الوجه الأول ابتداء ب :

(بسم الله الرحمن الرحيم المر) طبعاً هذه من الحروف المقطعات ، و هي تقول لنا بأن القرآن عبارة عن حروف جمعت في لسان الوحي ، ما هو إلا حروف ، كلمات ، حروف أصوات جمعت مع بعضها البعض و أظهرت لنا هذا الإعجاز اللغوي العظيم ؛ القرآن الكريم ، الذي فيه النبوءات و فيه التعاليم و فيه التفصيل و فيه الهيمنة و فيه الحكم على الكتب السابقة ، و على أي وحي يوحى ، (المر تلك آيات الكتاب) هي دي آيات الكتاب ، آيات الرسائل الإلهية ، تكون عبارة عن حروف ، حروف جمعت فيما بينها و أخرجت هذا الإعجاز العظيم ، (و الذي أنزل إليك من ربك الحق) ربنا بيثبت فؤاد محمد ﷺ و بيقوله : إنه أنزل إليك من الحروف دي حق ، الآيات دي حق ، الرؤا اللي بتشوفها حق ، (و لكن أكثر الناس لا يؤمنون) أكثر الناس كفار ، معروف ، أكثر الناس لا يؤمنون .

{اللَّهُ الَّذِي رَفَعَ السَّمَاوَاتِ بِغَيْرِ عَمَدٍ تَرَوْنَهَا ثُمَّ اسْتَوَى عَلَى الْعَرْشِ وَسَخَّرَ الشَّمْسَ وَالْقَمَرَ كُلٌّ يَجْرِي لِأَجَلٍ مُّسَمًّى يُدَبِّرُ الْأَمْرَ يُفَصِّلُ الْآيَاتِ لَعَلَّكُمْ بِلِقَاءِ رَبِّكُمْ تُوقِنُونَ} :

(الله الذي رفع السماوات بغير عمد) ربنا هنا بيصف نفسه ، بيصف نفسه ، (الله الذي رفع السماوات بغير عمد ترونها) يعني الكواكب و النجوم و الأفلاك و المجرات كلها موجودة في الفراغ فوق كده ، و إيه؟ مرتبطة ببعض بجاذبية خفية ، هي دي العمدة التي لا ترونها ، (الله الذي رفع السماوات بغير عمد ترونها) يعني مافيهاش عواميد ترونها ، لا ، فيها عواميد خفية اللي هي الجاذبية فيما بينها ، الجاذبية دي هي اللي بتسيطر على حركة الكواكب و حركة المجرات ، و الكواكب و المجرات و النجوم هي في حركة مستمرة حول نفسها و هي في إتساع دائم ، (و إنا لموسعون) ، قال تعالى (و إنا لموسعون) ، إذا السماوات و الكون يتسع بإستمرار ، يتسع بإستمرار ، و بعد كده هتأتي فترة هينكمش مرة أخرى كطي السجل للكتب ، كطي السجل للكتب ، زي الأوكريديون كده ، ابتداء بالإنفجار العظيم (كانتا رتقاً ففتقناهما) و بعد كده هو في تمدد مستمر ، الكلام ده طبعاً من مليارات السنين ، كل جُرم في هذا الكون يطوف حول نفسه و ثم يطوف حول كوكب مثلاً إن كان قمراً ، و ثم المجرة نفسها تطوف حول نفسها و تتسع بإستمرار الأكوان ، هذا الكون يتسع بإستمرار ، و ثم يأتي زمان سينكمش هذا الكون مرة أخرى كطي السجل للكتب ، دي حقائق فيزيائية ، حتى إنت لو شوفت أي خريطة فيزيائية للكواكب و النجوم هتجدد ما بينها شبكة وهمية كده ، إفتح كده ، هتلاقي النجوم و الكواكب كلها ما بينها شبكة وهمية من الجاذبية ، شبكة وهمية من الجاذبية ، هي دي بقى العمدة التي لا نراها ، عمد لا نراها لكن نشعر بها ، بعد كده لما ربنا كَوْن الكون ده بقى للمخلوقات الموجودة في الكون ، فعمل إيه؟ (ثم استوى على العرش) ثم ، مش فوراً يعني ، بعد ما سَوَى الكون كله و خلق فيه المخلوقات (استوى على العرش) يعني إيه؟ استوى على العرش ، يعني جعل صفاته

تفيض على هذا الكون و مخلوقاته ، حتى آدم ، آدم ده كان أول مكلف من البشر ، و أول نبي من البشر ، فمسه الفيض من ذلك العرش الذي استوى الله عليه ، لكن هل إستواء ربنا على العرش كان بعد آدم بس أو قبل آدم بس ، لا ، بعد أن خلق الكون ، (استوى على العرش) يعني فاضت صفاته على الكون و على المخلوقات ، و ظلت تفيض و ستفيض بإستمرار ، (و سخر الشمس و القمر) سخر الشمس و القمر لخدمتنا ، لخدمة البشر ، و لخدمة الأنبياء ، صح؟ إذاً سخر الشمس و القمر لخدمة البشر ليعرفوا الزمان و يعرفوا المواقيت و يعرفوا الإتجاهات ، و كمان الشمس بتفيد في المزروعات و بتفيد في التدفئة و الطاقة ، و القمر يفيد في حركة المد و الجزر في البحر ، فكل ده تسخير ، خدمة ، كذلك هناك خدمة مخصوصة من الشمس و القمر ، يبعثها الله للأنبياء أو لنبي الزمان ، دايماً كده تلاقي آيات الخسوف و الكسوف مناصرة لنبي الزمان ، (كل يجري لأجل مسمى) كل جُرم في السماوات و الأرض أو كل جُرم في هذا الكون يتحرك إلى أجل مسمى ، أجل معلوم عند الله عز و جل ، حتى يعود ينكمش الكون مرة أخرى كطي السجل للكتب ، ربنا عالم ، دقيق و عالم و لطيف ، (كل يجري لأجل مسمى) مسمى يعني مكتوب و إنتهى ، رفعت الأقلام و جفت الصحف ، العلم ده عند ربنا بس ، محدش يقدر يحدده ، هو الوحيد الذي يعلمه ، لذلك قال عن هذا الأجل (مسمى) سُميَّ يعني و إنتهى ، الموضوع خلاصان يعني ، (يدبر الأمر) ربنا هو المدير ، (يدبر الأمر) و يُعطي فيض التدبير للملايكة برضو ، لبعض الملائكة فيبقوا مدبرات (و المدبرات أمراً) إذاً ده من فيض ربنا على المخلوقات ، يعني من إستواء ربنا على العرش ، من ضمن إستواء ربنا على العرش كان إيه؟ إنه جعل بعض الملائكة مدبرات ، كما هو مدير ، فباستواء ربنا على العرش يظهر كماله في الأكوان (يفصل الآيات لعلكم بقاء ربكم توقنوا) يفصل الآيات يعني إيه؟ يبعث الرسل يبينوا الآيات إجمالاً و إيجازاً ، (لعلكم) يمكن توقنوا و يأتاكم اليقين ، إذاً فائدة بعث الأنبياء إيه؟ و تفصيل الآيات معهم إيه؟؟ اليقين ، إن الناس يبقى عندها يقين ، (لعلكم بقاء ربكم توقنوا) يبقى عندك يقين إنه في إله و إنك راجله ثاني ، و إنك رايحله و هتتأسب عنده ، اليقين ده شغلة مين؟ الأنبياء ، هم اللي بيحطوه للبشر ، مين اللي يقبل و مين اللي يرفض ، يعني منهم من يقبل قليل ، و منهم من يرفض و هم كثير ، شوفتوا بقى؟ ، يبقى ربنا لما استوى على العرش ، بعث الأنبياء بمهمة اليقين ، و ده برضو من وظائف الإستواء على العرش من الله عز و جل ، بعث الأنبياء ، المدبرات أمراً ، يجعل بعض الملايكة مدبرات و هكذا ، فهكذا إستواء ربنا على العرش له فيوض جملة و كثيرة لا تُحصى ، فهذا هو سر الإستواء على العرش . استوى على العرش أي ظهر كماله من خلال هذا الاستواء بفيض صفاته على الأكوان .

{وَهُوَ الَّذِي مَدَّ الْأَرْضَ وَجَعَلَ فِيهَا رَوَاسِيَ وَأَنْهَارًا وَمِنْ كُلِّ الثَّمَرَاتِ جَعَلَ فِيهَا زَوْجَيْنِ اثْنَيْنِ يُغْشِي اللَّيْلَ النَّهَارَ إِنَّ فِي ذَلِكَ لَآيَاتٍ لِّقَوْمٍ يَتَفَكَّرُونَ} :

(و هو الذي مد الأرض و جعل فيها رواسي و أنهاراً) هو الذي مهد كوكب الأرض ده يعني اللي إحنا عايشين عليه ، بيتكلم عنا إحنا ، القرآن بيتكلم عن البشر اللي في الأرض ، مانعرفش بقى هل في كائنات أخرى مكلفة في الكون ده؟؟ لا ندري ، ربما

، بس هو هنا بيكلمنا إحنا ، خطاب مخصوص ، (و جعل فيها رواسي) رواسي اللي هي الجبال ، الجبال عامله زي الأوتاد كده ، ماسكة طبقات الأرض ، (و أنهارا) الأنهار الجميلة اللي كانت سبب الحضارات الأولى زي نهر النيل مثلاً ، نهر الأمازون و نهر دجلة و الفرات ، صح كده؟ طيب ، (و من كل الثمرات) ربنا حط خاصية في الثمرات (جعل فيها زوجين اثنين يغشي الليل النهار إن في ذلك لآيات لقوم يتفكرون) ، (يغشي الليل النهار) جاعل الليل يعقب النهار ، و النهار يعقب الليل باستمرار ، لأن ده فيه فائدة لحياة البشر و لزراعتهم و لأعمالهم ، إن دايماً يبقى في تبادل ما بين الليل و النهار ، عشان يبقى في كونتراست .../تباين ، عشان حياة الإنسان مابقاش فيها ملل ، لازم يبقى في ليل و نهار ، و لو نهار على طول فالحياة لا تطاق ، لو ليل على طول فالحياة لا تطاق ، (إن في ذلك لآيات لقوم يتفكرون) ربنا هنا بيحفز عندنا خاصية التفكير و التدبر و إعمال العقل ، دايماً كده ربنا بيحثنا و يحفزنا على إعمال العقل و التدبر و التفكير ، (و من كل الثمرات جعل فيها زوجين اثنين) يعني إيه؟ ذكر و أنثى ، دايماً كده في الثمرات .

{وَفِي الْأَرْضِ قِطْعٌ مُّتَجَاوِرَاتٌ وَجَنَّاتٌ مِّنْ أَعْنَابٍ وَزَرْعٌ وَنَخِيلٌ صِنُونٌ وَغَيْرُ صِنُونٍ يُسْقَى بِمَاءٍ وَاحِدٍ وَنُفِضَ بَعْضُهَا عَلَى بَعْضٍ فِي الْأُكُلِ إِنَّ فِي ذَلِكَ لَآيَاتٍ لِّقَوْمٍ يَعْقِلُونَ} :

(و في الأرض قطع متجاورات) قطع متجاورات يعني إيه؟ شعوب متجاورة ، ثقافات متجاورة ، كذلك أراضٍ متجاورة ، و بساطتين متجاورة ، (و جنات من أعناب و زرع و نخيل صنوان و غير صنوان) صنوان يعني متشابه ، يُشبه بعضه بعضاً ، (و غير صنوان) أي لا يشبه بعضه بعضاً ، لأن الصنوا هو إيه؟ الشبيه ، (يسقى بماء واحد) مائة/مياه واحدة اللي نازلة ، مياه الأمطار أو الأنهار ، مياه عذبة يعني ، و هو ماء الوحي ، الرمزية الروحية يعني ، (و نفضل بعضها على بعض في الأكل) مواعيد الحصاد و نضوج الثمار دي بتختلف من نوع لنوع ، فربنا قال إيه (و نفضل بعضها على بعض في الأكل) يعني إيه؟ بعضها بيجي في وقت و بعضها الآخر بيجي في وقت تاني ، ف ده تفضيل ، (و نفضل بعضها على بعض في الأكل) الأكل يعني الحصاد ، وقت جني الثمار أو الحصاد ، (إن في ذلك لآيات لقوم يعقلون) تدبر ، حث على التدبر مرة أخرى و إعمال العقل .

{وَإِنْ تَعَجَّبَ فَعَجَبٌ قَوْلُهُمْ أَئِذَا كُنَّا تُرَابًا أُنْشَأْنَا لَفِي خَلْقٍ جَدِيدٍ أُولَئِكَ الَّذِينَ كَفَرُوا بِرَبِّهِمْ وَأُولَئِكَ الْأَغْلَالُ فِي أَعْنَاقِهِمْ وَأُولَئِكَ أَصْحَابُ النَّارِ هُمْ فِيهَا خَالِدُونَ} :

(و إن تعجب فعجب قولهم) ربنا هنا بيعزي النبي و كل نبي ، ببسليه ، بيعزيه يعني ، ببسري عنه ، (أئذا كنا تراباً أنْشَأْنَا لَفِي خَلْقٍ جَدِيدٍ) هنا ربنا بيكلم النبي كأنه صديقه ، كأنه إيه؟ صديقه ، (و إن تعجب فعجب قولهم أئذا كنا تراباً أنْشَأْنَا لَفِي خَلْقٍ جَدِيدٍ) الكفار

بيقولوا لما نموت هنتخلق تاني أو هنبعث مرة تانية ، معقولة؟؟ (أولئك الذين كفروا بربهم) اللي مايؤمنش بالبعث ، هذا كافر لأن ده ركن من أركان الإيمان ، (و أولئك الأغلال في أعناقهم) يوم القيامة يبقى في أغلال في أعناقهم ، سلاسل ، قيود ، (و أولئك أصحاب النار هم فيها خالدون) يدخلون النار ، يخلدون فيها إلى أمد يحدده الله عز و جل .

• و أثناء تصحيح نبي الله الحبيب يوسف الثاني ﷺ لتلاوتنا ، قال لنا :

طبعاً عارفين كلمة (يُغشي) يعني إيه ، أو غشاء ، يعني يُغطي ، الغين غبش و تغطية ، و الشين تفشي إنتشار ، و هكذا هو الليل يفعل بالنهار ، يُغشي .

و اختتم نبي الله الجلسة المباركة بقوله المبارك :

هذا و صلّ اللهم و سلم على نبينا محمد و على آله و صحبه و سلم ، سبحانك اللهم و بحمدك ، أشهد أن لا إله إلا أنت ، أستغفرك و أتوب إليك .

و الحمد لله رب العالمين . و صلّ يا ربي و سلم على أنبياءك الكرام محمد و أحمد و يوسف بن المسيح صلوات تلو صلوات طيبات مباركات ، و على أنبياء عهد محمد الآتين في مستقبل قرون السنين أجمعين . آمين .  

درس القرآن و تفسير الوجه الثاني من الرعد .

أسماء إبراهيم :

شرح لنا سيدي و حبيبي يوسف بن المسيح ﷺ أثناء جلسة التلاوة المباركة من أحكام التلاوة ؛ من أحكام المد , ثم قام بقراءة الوجه الثاني من أوجه سورة الرعد ، و أجاب على أسئلتنا بهذا الوجه ، و أنهى نبي الله الحبيب الجلسة بأن صحح لنا تلاوتنا .

بدأ نبي الله جلسة التلاوة المباركة بقوله :

الحمد لله ، الحمد لله وحده ، الحمد لله وحده و الصلاة و السلام على محمد و من تبعه من أنبياء عهده و بعد ، لدينا اليوم الوجه الثاني من أوجه سورة الرعد ، و نبدأ بأحكام التلاوة و أحمد :

مد فرعي بسبب السكون :

مد عارض للسكون و يكون غالباً في نهايات الآيات و يمد بمقدار ٤ إلى ٥ حركات .
و مد لازم حرفي أو كلمي : الحرفي هو في أوائل السور , و الكلمي مثقل و يُمد بمقدار ٧ حركات مثل (و لا الضالين) .

و المد الحرفي له ثلاثة أنواع : حرف واحد يمد حركة واحدة و هو الألف في حروف المقطعات في بداية السور ، مجموعة من الحروف تمتد بمقدار حركتين و هي مجموعة في جملة (حي طهر) ، و حرف تمتد بمقدار ٦ حركات و هي مجموعة في جملة (نقص عسلكم) .

و بعد أحمد قال الأحكام مروان ثم رفيده ثم أرسلان .

○ و ثم طلب سيدي يوسف بن المسيح ﷺ من أحمد قراءة سورة قريش ، و صحح له قراءته .

و ثم تابع نبي الله يوسف الثاني ﷺ الجلسة بشرح الوجه لنا فقال :

الوجه ده ببتكلم عن إيه ، بيتكلم عن أمور كثيرة جداً ، بداية منها أو بدايتها :

{وَيَسْتَعْجِلُونَكَ بِالسَّيِّئَةِ قَبْلَ الْحَسَنَةِ وَقَدْ خَلَتْ مِنْ قَبْلِهِمُ الْمَثَلَاتُ وَإِنَّ رَبَّكَ لَذُو مَغْفِرَةٍ لِلنَّاسِ عَلَى ظُلْمِهِمْ وَإِنَّ رَبَّكَ لَشَدِيدُ الْعِقَابِ} :

(و يستعجلونك بالسيئة قبل الحسنة) ربنا بيصف إيه ، نفسية الكفار في كل زمان و في كل مكان و مع كل نبي ، (و يستعجلونك بالسيئة قبل الحسنة) يعني إيه بقى؟ لها كذا معنى ، من معانيها : إنهم بيستعجلوا إن العذاب ييجي/يأتي عليهم ، بيستعجلوا الكفر قبل الإيمان ، كذلك (و يستعجلونك بالسيئة قبل الحسنة) يعني بيحاولوا يستفزوك عشان يخرجوا أسوء ما فيك ، و لكن لا تفعل ذلك ، ربنا هنا بينصح النبي ، و كذلك ينصح الكفار بشكل غير مباشر عندما يصف حالهم البائس ، (و يستعجلونك بالسيئة قبل الحسنة) يعني هم يسارعون في الكفر ، هذا هو إستعجالهم ، يسارعون في الكفر ، و كذلك (و يستعجلونك بالسيئة) يعني يستفزوك ليريدوا أن يخرجوا ما فيك من سوء أو من غيظ أو من غضب عليهم ، (و قد خلت من قبلهم المثالات) المثالات يعني إيه؟ العبر و العظات من الأمم السابقة ، كذلك (المثالات) يعني الأمثال التي ضربت في الصحف المقدسة السابقة ، لأن ربنا سبحانه و تعالى من صفاته إيه (و يضرب الله الأمثال) دائماً ربنا بيضرب الأمثال لتقريب الفكرة و لتسهيل الفهم على المتلقين ، (و إن ربك لذو مغفرة للناس على ظلمهم) ربنا هنا بيديهم/يعطيهم الرجاء و يقول لهم (و إن ربك لذو مغفرة للناس على ظلمهم) مع إنهم ظالمين ، ربنا بيغفر ، بيقولهم تعالوا يعني ، بيزرع فيهم الرجاء ، و إيه تاني؟ (و إن ربك لشديد العقاب) بيزرع فيهم الخوف ، عشان يبقى عندهم جناحين ؛ جناح الخوف و جناح الرجاء ، اللي هو هيرد تاني في الوجه ده ، في الآخر ، اللي هو (خوفاً و طمعاً) خوفاً أي خوف ، طمعاً يعني رجاء ، دائماً ربنا عاوزنا نبقي إيه ما بين الخوف و الرجاء .

{وَيَقُولُ الَّذِينَ كَفَرُوا لَوْلَا نُزِّلَ عَلَيْهِ آيَةٌ مِّن رَّبِّهِ إِنَّمَا أَنْتَ مُنذِرٌ وَلِكُلِّ قَوْمٍ هَادٍ} :

(و يقول الذين كفروا لولا أنزل عليه آية من ربه) ربنا هنا بيصف نفسية الكفار تاني في كل زمان و في كل مكان و مع كل نبي ، (و يقول الذين كفروا لولا أنزل عليه آية من ربه) هو إيه النبي ده مش يورينا كده آية على صدقه؟؟؟ عاوزين آية مادية ، بيقصدا الآية المادية ، دائماً الكفار كده بيسألوا عن الآية المادية ، اللي هي ساعات ممكن يُخيل للناس إن السحرة بيعملوها ، فممكن تشتبه على الناس ، هل دي آية و لا سحر؟؟ ، عشان كده ربنا بيحب دائماً الآيات المعنوية و الآيات الروحية ، ربنا بيفضل الآيات دي على فكرة ، و دي اللي ربنا خصها لأمة الإسلام و هي أعظم الآيات و أزكى الآيات و أعلى الآيات و أقوى الآيات و أبقى الآيات ، (و يقول الذين كفروا لولا أنزل عليه آية من ربه) فربنا بيعزي النبي و بيسليه و بيسري عنه ،

فبيقوله إيه؟ (إنما أنت منذر) بيثبته ، أنت منذر ، قل الكلام و خلاص ، (و لكل قوم هاد) لها كذا معنى ؛ يعني لكل قوم نبي مرسل هاد ، لأن النبي هاد ، يهدي الطريق و لكنه لا يهدي القلب ، مش مسؤول عن هداية القلب ، هو يهدي الطريق ، يعني إيه؟ يوريهم الطريق فبين بس ، و هداية القلب دي لها حسابات تانية ، على حسب إختيار الناس ، إنهم لما يختاروا هيبقوا مسيرين بعد كده للهداية ، لما يختاروا الإيمان و الرضا و الإستخارة ، ربنا هيهديهم و هيسيرهم للهداية و للإيمان ، و هنشوف موضوع الإختيار و التسيير في هذا الوجه أيضاً ، (و لكل قوم هاد) هاد يعني نبي ، كذلك (و لكل قوم هاد) يعني طريقة يُهدّوا بها في مسالك الغيب و القدر ، ربنا عالم بها ، لأنه أعلم بالنفوس ، منهم اللي يُهدّوا إليها نتيجة إنه هو إختار و أراد أي المكلف ، و منهم الذي لن يُهدى لها لأنه لم يختار و لم يُرد .

{اللَّهُ يَعْلَمُ مَا تَحْمِلُ كُلُّ أُنْثَىٰ وَمَا تَغِيضُ الْأَرْحَامُ وَمَا تَزِدَادُ وَكُلُّ شَيْءٍ عِنْدَهُ بِمِقْدَارٍ} :

خلي بالك الآية دي فيها إعجاز علمي عظيم ، طبعاً زمان ماكنوش يعرفوا الكلام ده ، إحنا دلوقتي عارفين ، إيه هو بقى؟ ، الله يُثبت صفة من صفاته العظيمة و سُنّة من سُنّنه العظيمة في هذا الكون (الله يعلم) عالم ، (ما تحمل كل أنثى) كل أنثى هنا يعني كل الثدييات ، مش شرط بشر بس ، (الله يعلم ما تحمل كل أنثى) كل أنثى من الثدييات ، ربنا عالم هي تحمل متى و إزاي و فين و في أد إيه ، (و ما تغيض الأرحام) يعني إيه ، اللي هي هتنزل من الأرحام بقى ، إيه الشيء اللي هينزل من الأرحام ، سواء جنين مكتمل النمو أو جنين ناقص النمو فيسمى سقط أو دم الحيض ، هو ده معنى (غيبض الأرحام) ، خلي بالك بقى (و ما تزدداد) يعني إيه (و ما تزدداد)؟ ممكن الحمل يبقى سنجل ، مفرد يعني ، و ممكن يبقى توأم ف ده برضو من الزيادة ، كذلك في ظاهرة علمية تم إكتشافها حديثاً اللي هو الحمل فوق الحمل ، يعني الأنثى لما تحمل ، ممكن يعدي دورة شهرية و تحمل تاني ، بس دي حالات نادرة في البشر ، لكنها شُهدت بكثرة في بعض الحيوانات ، هو ده معنى (و ما تزدداد) ، بنسميه أوفر برجنانسي over pregnancy حمل فوق حمل ، ربنا بيقول أهو (الله يعلم ما تحمل كل أنثى و ما تغيض الأرحام و ما تزدداد) زي كده الآية العظيمة اللي ربنا إتكلّم فيها عن البنات اللي بيكبروا في السن و أجسامهم بتكبر بس ما بيحيضوش ، قال عنهم أحكام ، ربنا قال إيه (و اللائي لم يحضن) طبعاً ده الفهم الصحيح ، مش الفهم الخاطئ بتاع مشايخ القرون الوسطى ، مشايخ الظلام ، إن هو (اللائي لم يحضن) يعني البنات الصُغيرة ، مينفعش ، مش صحيح ، (و اللائي لم يحضن) البنت اللي كبرت ، مثلاً وصلت ١٥ ، ١٦ سنة ، و التي لم يأتها دم الدورة ، عندها حاجة بنسُميها أمينورية amenorhea ... يعني هي كده طبيعتها ما بتحضش ، دي لها أحكام في الفقه عادي ، تمام ، ربنا ذكرها بس مين اللي يعرفها؟ إحنا عرفناها دلوقتي ، و زمان كانوا عارفين إنه في بنات ما بيحيضوش ، يبقى كل فهم صحيح هو إنك تعرض الفهم ده على القرآن الكريم و تربطه بقواعد القرآن الخاصة و العامة ، أي إنحراف يحدث في الفقه ، ف ده نتيجة عدم فهم القرآن ، و عدم عرض الفكرة على القرآن ، خذها قاعدة .

(و كل شيء عنده بمقدار) ربنا بيقدر الأقدار ، و المقدار ده إما يكون مطلق أو إنه يكون مرتبط بتخيير مُكلف ، أو بفعل أمر مُخَيَّر فيه مُكلف ، إذا التقدير أو القدر ده المُبرم اللي يحصل إما إنه يكون مطلق في أمور كونية أو في أمور عادية جداً ، أو تكون نتيجة إختيار من إختيارات المكلفين ، فربنا يُعطي بعدها قدر مُبرم و هكذا ، في سلسلة من التسييرات ، في سلسلة من التخييرات و التسييرات المتتابعة المتتالية .

{عَالَمُ الْغَيْبِ وَالشَّهَادَةِ الْكَبِيرُ الْمُتَعَالِ} :

(عالم الغيب و الشهادة) ربنا بيصف نفسه تاني عشان نفهمه و نعرفه و نقرب منه ، (عالم الغيب و الشهادة) (عالم الغيب) ربنا عالم بكل الغيوب الخفية المحجوبة ، (و الشهادة) أي و الأمور الواقعة ، و كلتا الحالتين : الغيب و الشهادة هي حقيقة ، الغيب حقيقة و الشهادة حقيقة ، لكن الغيب محجوب و الشهادة واقعة ، بيصف نفسه تاني (الكبير المتعال) الكبير يعني مفيش حد أكبر منه ، مفيش حد أكبر منه سيطرة ، مفيش حد أعظم منه ، متعال يعني العلي ، متعال ، علي ، كل دي صفات عظيمة و فخر و قوة لله سبحانه و تعالى .

{سَوَاءٌ مِّنْكُمْ مَّنْ أَسَرَ الْقَوْلَ وَمَنْ جَهَرَ بِهِ وَمَنْ هُوَ مُسْتَخْفٍ بِاللَّيْلِ وَسَارِبٌ بِالنَّهَارِ} :

هنا ربنا بيقول لهم ، بيحفر عندهم صفة الإحسان ، اللي هي أن تراقب الله ، يعني أن تعبد الله كأنك تراه ، فإن لم تكن تراه فإنه يراك ، لأن درجة الإحسان هي أعظم درجة في الإيمان و في الدين ، تضمن للمؤمن الخلود المتعاقب في الجنان المتعاقبة ، هو الإحسان ، و الإحسان صورته كثيرة جداً ، ماشي ، و قلناها في غير موضع ، (سواء منكم من أسر القول) قلت الكلام سراً ، (و من جهر به) أو جهرت به ، (و من هو مستخف بالليل) بيعمل حاجة في ظلمة الليل ، (و سارب بالنهار) يعني بيعمل الفعل بتاعه أو بيفعل الفعل بتاعه في وضوح النهار ، كل ده ربنا مُسيطر عليه ، كل ده ربنا عالم به ، (عالم الغيب و الشهادة) فين الغيب هنا؟ (من أسر القول) ، فين الشهادة؟ (و من جهر به) ، فين الغيب هنا؟ (و من هو مستخف بالليل) ، فين الشهادة هنا؟ (و سارب في النهار) ، إذاً (أسر القول) ده غيب ، (جهر به) ده شهادة ، (مستخف بالليل) ده غيب ، (سارب في النهار) دي شهادة ، خلاص ، كل ده تحت سيطرة ربنا سبحانه و تعالى .

{لَهُ مُعَقِّبَاتٌ مِّن بَيْنِ يَدَيْهِ وَمِنْ خَلْفِهِ يَحْفَظُونَهُ مَن أَمَرَ اللَّهُ إِنَّ اللَّهَ لَا يُغَيِّرُ مَا بِقَوْمٍ حَتَّى يُغَيِّرُوا مَا بِأَنفُسِهِمْ وَإِذَا أَرَادَ اللَّهُ بِقَوْمٍ سُوءًا فَلَا مَرَدَّ لَهُ وَمَا لَهُم مِّن دُونِهِ مِن وَالٍ} :

(له معقبات من بين يديه و من خلفه يحفظونه من أمر الله) الإنسان المُكلف ، (من أمر الله) أي بأمر الله ، (له معقبات من بين يديه و من خلفه يحفظونه) ربنا بيبعت ملايكة لكل إنسان تحفظه من الشياطين و من الشرور ، كل إنسان على الفطرة ، ربنا يحفظه من الشياطين و من الشرور ، و ذلك بأمر الله ، (من أمر الله) أي بأمر الله ، (له معقبات من بين يديه و من خلفه يحفظونه من أمر الله) مش يحفظوه من أمر ربنا ، يعني ربنا أمر بحاجة فالملايكة هتحفظ الإنسان من الأمر اللي ربنا أمره ، لا ، (من أمر الله) أي بأمر الله ، يعني الأمر ده خارج من الله ، ماشي؟ أي صادر عن الله ، (إن الله لا يغير ما بقوم حتى يغيروا ما بأنفسهم) هنا ربنا بياكد على مبدأ التخيير و التسيير ، هو ربنا بياكد أهو (إن الله لا يغير ما بقوم) يعني لا يُسيرهم في شيء ، (حتى يغيروا ما بأنفسهم) حتى هم يختاروا إختيارهم الصحيح أو السيء على حسب ، إذاً هنا ربنا بياكد على مبدأ أن الإنسان مُخيّر و بإختياره يكون فيما يليه مُسيّر ، في سلسلة من التخييرات و تتبعها التسييرات و هكذا ، أهو واضح (إن الله لا يغير ما بقوم حتى يغيروا ما بأنفسهم) غَيّر/إعمل تغيير فربنا هيسيرك في طريق معين ، يعني إختيار فربنا هيسيرك في طريق معين ، يبقى ده تأصيل لمبدأ إيه؟ إن الإنسان مُخيّر و بإختياره يكون فيما يليه مُسيّر ، في سلسلة متعاقبة متسلسلة من التخييرات و التسييرات ، حد قال لك الكلام ده قبل كده؟؟ ربنا هو اللي يفتح بهذا الأمر ، و الأدلة موجودة في القرآن أهى ، لكن محدش بيتدبر القرآن ، (و إذا أراد الله بقوم سوءاً فلا مرد له) لو هؤلاء القوم إختاروا طريق سوء فربنا هيريد بهم سوء ، (فلا مرد له) يبقى هنا القضاء ساعتها مُبرم ، (و ما لهم من دونه من وال) محدش يقدر يوقف أمام ربنا اي لا احد يستطيع تحدي ربنا ، و لا يُواليهم أمام ربنا ، ما دام ربنا أراد بهم سوء جزاء أعمالهم ، لأن الجزاء من جنس العمل .

{هُوَ الَّذِي يُرِيكُمُ الْبَرْقَ خَوْفًا وَطَمَعًا وَيُنْشِئُ السَّحَابَ الثِّقَالَ} :

ربنا بيصف نفسه تاني (هو الذي يريكم البرق خوفاً و طمعاً و ينشئ السحاب الثقيل) ربنا بيوريكم أمثلة في الكون تنمي عندكم إحساس الخوف و الرجاء ، اللي هو دائماً عاوزكم فيه ، ما بين الخوف و الرجاء ، أهو (خوفاً و طمعاً) طمعاً يعني رجاء ، رجاء في رزق الله أو في رحمة الله ، (هو الذي يريكم البرق) البرق اللي هو إيه؟ النور اللي بيظهر في السحاب بالليل ، وقت هطول الأمطار ، برق اللي هو يسبق صوت الرعد ، لأن إحنا عارفين إن سرعة الضوء أسرع من الصوت بمراحل كثيرة جداً ، تقريباً سرعة الضوء ٣٠٠ ألف كيلو متر في الثانية (الصحيح ٣٠٠٠٠٠ متر في الثانية) ، لكن سرعة الصوت ٣٠٠ كيلو في الثانية (الصحيح ٣٤٠ متر في الثانية) (صححها نبي الله بعد الجلسة بعد ان راجعها) ، نحاول برضو و نتأكد منها ، لكن أعتقد إن هي دي الصحيحة يعني ، (و ينشئ السحاب الثقيل) السحاب الثقيل اللي هي الغمام الكثير المُثقل بالمياه و الأمطار ، و طبعاً كل ده رموز على رزق الله عز و جل ، (و ينشئ السحاب الثقيل) أي أرزاق الله الروحية و المادية ، (هو الذي يريكم البرق خوفاً و طمعاً) كمان البرق هنا نستطيع إن إحنا نأوله برضو من معانيه إيه؟ البعث ، البعث اللي بيحيي معه السحاب الثقيل ، إذاً البرق هنا هو البعث و نور الأنبياء ، (خوفاً و طمعاً) منكم اللي هيخاف و منكم اللي هيرجو ، فأنا عاوزكم إنتو

اللي يبقى فيكم الصفتين الخوف و الرجاء ، (و ينشئ السحاب الثقال) أي العلوم الروحانية العظيمة و الوحي المنهمر مع بعث هذا النبي ، و مش هينهمر على النبي بس ، على أصحابه و العالم كله و تنتشر العلوم كما قال المسيح الموعود ﷺ .

{وَيُسَبِّحُ الرَّعْدُ بِحَمْدِهِ وَالْمَلَائِكَةُ مِنْ خِيفَتِهِ وَيُرْسِلُ الصَّوَاعِقَ فَيُصِيبُ بِهَا مَنْ يَشَاءُ وَهُمْ يُجَادِلُونَ فِي اللَّهِ وَهُوَ شَدِيدُ الْمِحَالِ} :

(و يسبح الرعد بحمده) الرعد لما نسمع صوته كده ، صوت قوي مهيب تذكر و تتخيل إن الرعد ده كائن يُسَبِّح بحمد الله ، (و الملائكة من خيفته) و الملائكة برضو بتسبح من خيفته ، من الخوف من الله عز و جل ، (و يرسل الصواعق فيصيب بها من يشاء) ربنا يرسل أثناء نزول الأمطار دي و البرق و الرعد ؛ صواعق : يعني نار كده تنزل من السما ، شحنات ، تفريغ شحنات كهربائية قوية جداً ، بتنزل على ممكن على شجرة ، على بيت ، على أي حاجة ، و بعدين؟؟ الناس حالهم دايماً ، في منهم كثيرين بيشتكوا في وجود الله فربنا بيقول أهو (و هم يجادلون في الله) هو موجود و لا لا ، (و هم يجادلون في الله) هل هو موجود و لا لا؟؟ ، فلما تبص/تنظر و تتفكر في الرعد و البرق و الصواعق ، أقل حاجة يعني ، الكون المنظور ده ، تدبروا فيه هتجدوا فيه شواهد على وجود الإله ، طبعاً إحنا عارفين إن وجود الإله مثبت عندنا ضد الملحدين بأربعة أدلة ؛ أول حاجة : بعث الأنبياء و تحقق النبوءات ، إثنين : إستجابة الدعاء ، ثلاثة : بدء الخلق ، دايماً كده أي شيء مخلوق ، الخلايا دايماً ، لازم تبدأ من العدم ، دي مُسَلِّمة علمية ، لازم تبقى موجودة من العدم ، العناصر و الذرات ، فمين اللي عملها من العدم؟؟؟ قوة خفية عظيمة اللي إحنا بنسميها الله ، الإله ، رابع حاجة : الثواب و العقاب في الدنيا قبل الآخرة ، الثواب و العقاب في الدنيا قبل الآخرة ، الأربع حاجات دي أقوى أدلة نرد بها على أي منكر لوجود الله ، (و هم يجادلون في الله) و ربنا إيه بقى؟ (و هو شديد المحال) ربنا شديد المحال ، المحال أي الذي يُغَيِّر من حال إلى حال بشدة و بقوة ، هو ده المحال ، محال ((من أصوات الكلمات)) : حال يعني حال ، و الميم مفاعلة ، و المفاعلة فيها لذة نعمة أو ألم ، و الحال قد يكون نعيم و قد يكون عذاب ، فهذه هي إيه اللذة و الألم ، كذلك الميم مفاعلة ، المحال هو إيه؟ إنتقال من حال إلى حال ، كذلك (شديد المحال) يعني إيه؟ شديد الحيلة ، قوي الكيد و الحيلة ، محدش يقدر عليه ، محدش يقدر عليه ، و لا حد يقدر يتوقعه ، محدش يقدر يوقف قدامه و يتحداه فلازم تسلمله ، هو ده معنى شديد المحال ، كذلك شديد المحال أي شديد الحول ، مش إحنا بنقول لا حول و لا قوة إلا بالله ، إذاً الإحاطة و الحول هي من الله و هي صفة من صفات الله عز و جل ، و هو شديد المحال .

• و أثناء تصحيح نبي الله الحبيب يوسف الثاني ﷺ لتلاوتنا ، قال لنا :

- كمان ربنا قال عن الأمثال السابقة و الأمم السابقة (مثلات) أي أنها تمثّل بين يدي الله يوم القيامة ، مَثُل ، مَثَلْتُ ، مَثَلَات أي التي سوف تمثّل و تقرر مثولها في الغيب أمام الله يوم القيامة الكبرى ، فلذلك عَبَّرَ عنها بالمثلات أي التي ستمثّل طوعاً أو

كرهاً للعرض بين يدي الله عز وجل ، فعَبَّرَ عنها بالمثلات ، كذلك (مثلات) لأن الأعمال تتمثل ، الأعمال تتمثل ، فستَمَثَّلُ و تتمَثَّلُ يوم القيامة ، فعَبَّرَ عن الأعمال و الأمثال بالمثلات ، و كذلك الأرواح نعلم أنها تتمثل و تلبس أجساد الأكوان الأخرى ، و الرؤى مخلوقات و مثلات و مشاهد يخلقها الله عز وجل ، فهي مثلات أيضاً ، كل هذا من معاني المثلات ، إذا المثلات من التَمَثَّل و كذلك المثلات من الإمتثال و الطاعة .

- كذلك من معاني معقبات ، (له معقبات) أي أن الله يملك معقبات يجعلها ما بين يدي الإنسان و من خلفه يحفظونه بأمر الله عز وجل ، كذلك (له معقبات) أي مَفْعِلَات ، صفات يُفَعِّلُها في الإنسان ، صفات خفية ، و حواس خفية يُفَعِّلُها في الإنسان ، ما بين يدي الإنسان و من خلفه يحفظونه من أمر الله ، و هي ما يُسميها علماء الطاقة بالشَكَرَات ، الموجودة في أجزاء الإنسان ، و هي مغلقة تحفظ الإنسان من أي طاقة شريرة .

و اختتم نبي الله الجلسة المباركة بقوله المبارك :

هذا و صَلِّ اللَّهُم و سلم على نبينا محمد و على آله و صحبه و سلم ، سبحانك اللهم و بحمدك ، أشهد أن لا إله إلا أنت ، أستغفرك و أتوب إليك .

و الحمد لله رب العالمين . و صَلِّ يا ربي و سلم على أنبياءك الكرام محمد و أحمد و يوسف بن المسيح صلوات تلو صلوات طيبات مباركات ، و على أنبياء عهد محمد الآتين في مستقبل قرون السنين أجمعين . آمين .  

درس القرآن و تفسير الوجه الثالث من الرعد .

أسماء إبراهيم :

شرح لنا سيدي و حبيبي يوسف بن المسيح ﷺ أثناء جلسة التلاوة المباركة من أحكام التلاوة ؛ أحكام المدود الخاصة ، ثم قام بقراءة الوجه الثالث من أوجه سورة الرعد ، و أجاب على أسئلتنا بهذا الوجه ، و أنهى نبي الله الحبيب الجلسة بأن صحح لنا تلاوتنا .

بدأ نبي الله جلسة التلاوة المباركة بقوله :

الحمد لله ، الحمد لله وحده ، الحمد لله وحده و الصلاة و السلام على محمد و من تبعه من أنبياء عهده و بعد ، لدينا اليوم الوجه الثالث من أوجه سورة الرعد ، و نبدأ بأحكام التلاوة و أحمد :

المدود الخاصة و تمد بمقدار حركتين ، و هي :

- مد لين مثل بيت ، خوف .

- مد عوض مثل أبدا ، أحدا

- مد بدل مثل آدم ، أزر .

- مد الفرق مثل الله ، الذكرين .

-

و بعد أحمد قال الأحكام مروان ثم رفادة ثم أرسلان .

○ و ثم طلب سيدي يوسف بن المسيح ﷺ من أحمد قراءة سورة الزلزلة ، و صحح له قراءته .

و ثم تابع نبي الله يوسف الثاني ﷺ الجلسة بشرح الوجه لنا فقال :

هذا الوجه العظيم ، يعني إيه ، وجه تتجلى فيه و تظهر فيه صفة يُحبها الله ، صفة عظيمة جداً من صفات الله ، الله يُحبها ، و هي صفة ضرب الأمثال ، صفة ضرب الأمثال ، في هذا الوجه هناك أمثال كثيرة مضروبة ، تحتاج إلى إيه؟ تدبر ، و تحتاج إلى خشوع ، و تحتاج إلى تفكر ، و تحتاج إلى فهم عميق ، فهم باطني عميق ، فهم روحاني عميق ، يقول تعالى :

{لَهُ دَعْوَةُ الْحَقِّ وَالَّذِينَ يَدْعُونَ مِنْ دُونِهِ لَا يَسْتَجِيبُونَ لَهُمْ بِشَيْءٍ إِلَّا كَبَاسِطٍ كَفَّيْهِ إِلَى الْمَاءِ لِيَبْلُغَ فَاهُ وَمَا هُوَ بِبَالِغِهِ وَمَا دُعَاءُ الْكَافِرِينَ إِلَّا فِي ضَلَالٍ} :

(له دعوة الحق) مين له دعوة الحق؟ الله و من أرسل من الرُّسل ، الله و رسله يدعون إلى الحق ، و كلامهم هو الحق ، و كلامهم هو اليقين ، و هو الصدق ، و هو الحياة ، (له دعوة الحق و الذين يدعون من دونه لا يستجيبون لهم بشيء) هنا ربنا بيقارن بين التوحيد و الشرك ، بيصف حال المشركين و يقول : الآلهة الزائفة اللي بيشركوها مع الله ، الكفار أو المشركين لما ييجوا يدعوا الآلهة دي أو الأمور اللي أشركوا بها مع الله عز و جل ، تلك الأمور لا تستجيب لهم ، أو تلك الآلهة الباطلة لا تستجيب لهم ، طيب إزاي؟؟؟ هنا ضرب ربنا المثل العظيم ، (له دعوة الحق و الذين يدعون من دونه لا يستجيبون لهم بشيء) (من دونه) يعني من غيره ، كذلك (من دونه) يعني إيه؟ أقل من الله عز و جل درجة ، درجات ، لا يُقارنوا به ، (من دونه) ، (و الذين يدعون من دونه لا يستجيبون لهم بشيء) إزاي بقى لما واحد مشرك مجرم يدعو إله غير الله عز و جل ، يعني بيدعيه كده إنه يستجيبه ، ربنا بيقول إن الآلهة الباطلة دي لا تُجيب ، لا تُجيب الدعاء ، لا تُجيب الدعاء و بالتالي مش إحنا قلنا إن إستجابة الدعاء أحد أدلة وجود ربنا؟؟؟ الأربعة اللي إحنا قلناهم؟؟؟ اللي هو أول دليل : بعث الأنبياء و تحقق النبوءات ، ثاني دليل : إستجابة الدعاء ، ثالث دليل : بدء الخلق ، يجب أن يكون من العدم ، لأن عناصر الخلية الأولية ، و الذرات و العناصر يجب أن تكون إبتدأت من العدم ، مينفعش تكون أتت وحدها كده ، مينفعش مينفعش ، لازم يكون لها مُوجد ، رقم أربعة : كان الثواب و العقاب في الدنيا قبل الآخرة ، هنا بقى ربنا إستعمل دليل الدعاء على وجوده سبحانه ، فقال : إن الآلهة الباطلة دي لا تُجيب الدعاء للمشركين ، إزاي؟؟؟ زي ما يكون واحد واقف قدام/أمام بركة ماء أو ترعة فيها ماء ، و عاوز يشرب ، فبيمد إيده كده ، بيعمل إيده كده للمية/للماء و بيقولها تعالى ، عاوز أشربك ، المية هتنتظله/هتقفز له في إيده؟؟؟ عشان يشرب؟؟؟ كذلك الآلهة المشتركة لا تُجيب الدعاء ، الآلهة التي أشركت مع الله عز و جل لا تُجيب الدعاء ، لا تستجيب و لا تُجيب ، يعني هي لا تستجيب و كذلك لا تُجيب ، ماشي؟ ، أي لا تتفاعل و لا تُعطي رد فعل للدعاء ، يعني لا تتفاعل بالدعاء و لا تُعطي رد فعل للدعاء ده بإنها تُجيب ، تمام؟ ، إذا هي لا تسمع و لا تستجيب و لا تُجيب .

(و الذين يدعون من دونه لا يستجيبون لهم بشيء إلا كباسط كفيه إلى الماء ليبلغ فاه و ما هو ببالغهِ) بيقول للمية يلا تعالى في إيدي عشان أشربك ، المية هتجيله؟؟؟ مش هتجيله ، كذلك الآلهة المشتركة لا يُجيبون الدعاء ، (و ما دعاء الكافرين إلا في ضلال) دائماً كده إهتمامات الكفار و المشركين في ضلال ، ضالة مشتتة ، فيها علة التشتت ، ضَلَّ ، ضلال ، فعَال ، إستمرار ، فعل مستمر ، إنهم ما داموا كفار و مشركين و مش موحدين ، مش مخلصين التوحيد لله عز و جل ، هتكون حياتهم كلها

خسران و ضلال و تشتت و آلام ، علة التشتت هتكون ملازمة لهم : ضل : الضاد تشتت ، اللام علة ، مش إحنا تعلمنا كده من أصوات الكلمات؟؟؟ .

{وَلِلَّهِ يَسْجُدُ مَنْ فِي السَّمَاوَاتِ وَالْأَرْضِ طَوْعًا وَكَرْهًا وَظُلُلًا لَهُمُ بِالْغُدُوِّ وَالْآصَالِ} :

(و لله يسجد من) ربنا هنا حدد الآية دي ، طبعاً كل شيء يسجد لله ، كل شيء يُطيع الله ، سواء عاقل أو غير عاقل ، لكن ربنا هنا حدد الآية دي ، حدد فيها صفة العاقلين ، اللي هم مين؟؟ الإنس و الجن و الملائكة ، صح؟ و من الجن طبعاً الشياطين و الملائكة ، الملائكة يعتبروا نوع من أنواع الجن ، مستتر ، لا نراه ، هؤلاء عاقلين ، (و لله يسجد من في السماوات و الأرض) (من) يعني العاقل ، (في السماوات و الأرض) يعني اللي إنت شايفهم و اللي إنت مش شايفهم ، اللي إنت مش شايفهم في السماوات ، و اللي إنت شايفهم في الأرض ، كذلك اللي إنت شايفهم في السماوات ، و اللي إنت مش شايفهم في الأرض ، لأن السماوات ممكن تشوف فيها حاجات و ممكن ماتشوفش فيها حاجات ، بس هي موجودة ، مش شرط إن إنت ما شفتهاش إن هي مش موجودة ، كذلك الأرض فيها حاجات إنت شفتها و حاجات إنت مش شايفها ، كل حاجة من دول بقى ، طائعة لله عز و جل برضاها أو غصب عنها ، برضاها (طوعاً) ، غصب عنها (كرهاً) ، غصباً عنه ربنا بيحيط بهم ، مش إحنا قلنا (ربنا شديد المحال) شديد المحال ، الحول كله بيديه ، القوة كلها بيديه ، يُغير من حال إلى حال بقوة و بشدة و هو شديد الحيلة ، محال ، فبتالي كده كده ربنا مخلق عليهم ، مُحيط بهم ، مابقدروش يهربوا منه و لا من أقداره المبرمة ، فبتالي هم طائعين غصباً عنهم ، يعني ساجدين غصباً عنهم ، حتى و لو مش برضاهم ، زي الشياطين و كفرة الجن و كفرة البشر ، هؤلاء ساجدين غصباً عنهم ، و في اللي ساجدين برضاهم ، اللي عليهم الرضا ، و اللي لهم الرضا ، زي مؤمني البشر و مؤمني الجن و الملائكة طبعاً ، خلي بالك بقى في الوصف البديع ده ، في وصف جميل جداً هنا و بديع و ضرب مثل عظيم جداً للطاعة و السيطرة الإلهية ، (و لله يسجد من في السماوات و الأرض طوعاً و كرهاً) خلي بالك (و ظلالهم بالغدو و الآصال) حتى أظلال الأجسام دي ، اللي شايفينها أو مش شايفينها ، أي جسم له ظل ، حتى أظلال الأجسام دي ، طبعاً سواء كانت أظلال حقيقة أو أظلال مجازية ، المهم ، الظل هو التابع ، مش كل جسم يبقى له تابع؟؟ الظل ، الظل بنشوفه إمتى؟ في مرتين ، (بالغدو) اللي هو وقت الضحى ، (و الآصال) اللي هو بعد العصر ، مش إحنا بينشوف شجرة جنبنا هنا كده ، لها ظلين(٢) ، إزاي؟ في الضحى بنلاقي الظل بتاعها يمين ، و بعد العصر بنلاقي ظلها شمال ، على حسب حركة الأرض حول الشمس ، حسب وجود الشمس فين بالنسبة للشجرة ، كذلك أي كائن مُكلف له ظل ، ربنا هنا بيصف شدة الطاعة و شدة سيطرة الإله سبحانه و تعالى عليهم ، إن حتى الظل بتاع المكلفين هؤلاء ساجد لله ، إذا الجسم الأصلي ساجد طوعاً و كرهاً ، كذلك الظل التابع ، أي تابع لك ، أيضاً ساجد لله ، أي إرادة لك تابعة ساجدة لله أي طائعة لله طوعاً أو كرهاً ، فإنت إختار ، مش هتهرب من ربنا ، (ففرّوا إلى الله) محدش يقدر يهرب من ربنا ، فبتالي قصر عليك الموضوع و إرضى ، إرضى ، من رضى فله الرضا و من سخط

فعليه السخط ، فربنا هنا بيضرب مثال عظيم ، إنتم طائعين كرهاً أو طوعاً ، كذلك أظلالكم اللي بتظهر فين؟ في الضحى أو بعد العصر ، ماشي؟ طيب .

{قُلْ مَنْ رَبُّ السَّمَاوَاتِ وَالْأَرْضِ قُلِ اللَّهُ قُلْ أَفَاتَّخَذْتُمْ مِنْ دُونِهِ أَوْلِيَاءَ لَا يَمْلِكُونَ أَنْفُسِهِمْ نَفْعًا وَلَا ضَرًّا قُلْ هَلْ يَسْتَوِي الْأَعْمَى وَالْبَصِيرُ أَمْ هَلْ تَسْتَوِي الظُّلُمَاتُ وَالنُّورُ أَمْ جَعَلُوا لِلَّهِ شُرَكَاءَ خَلَقُوا كَخَلْقِهِ فَتَشَابَهَ الْخَلْقُ عَلَيْهِمْ قُلِ اللَّهُ خَالِقُ كُلِّ شَيْءٍ وَهُوَ الْوَاحِدُ الْقَهَّارُ} :

(قل من رب السماوات و الأرض قل الله) هنا ربنا بيسأل النبي عشان يسأل قومه ، بيقول له إيه : (قل من رب السماوات و الأرض) مين الرب؟؟ و بعد كده قل لهم الإجابة : (قل الله) ، و بعد كده قل لهم إيه : (قل أفاتخذتم من دونه أولياء لا يملكون لأنفسهم نفعاً و لا ضرراً) إذا كنتم عارفين إن الله هو الرب ، رب السماوات و الأرض ، أومال بتشركوا مع الله آلهة أخرى ليه؟؟؟ و تتخذون أولياء من دون الله أو مع الله؟؟ الأولياء هؤلاء و الآلهة الأخرى الباطلة دي (لا يملكون لأنفسهم نفعاً و لا ضرراً) زيكم زيههم ، لا يملك نفع و لا ضرر ، أمرهم بيد الله ، و بعد كده ربنا بيضرب مثال عظيم برضو ، أمثال (قل هل يستوي الأعمى و البصير) ربنا هنا بيصف نفسه بالبصير و بيصف الآلهة الزائفة بالأعمى ، هنا قارن ما بين البصر و العمى ، أو الإبصار و العمى ، (قل هل يستوي الأعمى و البصير) كذلك ، كذلك ضرب مثل ثاني (أم هل تستوي الظلمات و النور) ربنا وصف نفسه بالنور ، بالنور ، مفرد ، نور مفرد ، و وصف الآلهة الباطلة إيه؟ ظلمات ، لذلك سبيل الله هو سبيل واحد ، و سبيل إبليس سُئِلَ ، سُئِلَ كثيرة تُبعد عن الله عز و جل ، لكن طريق ربنا واحد : التوحيد ، دعوة الأنبياء ، الإستجابة ، نستجيب للنبي لما ييجي يدعو ، و هنعرف دلوقتي إيه أثر الإستجابة للنبي في آخر آية في الوجه ده ، و إنك لا تملك من نفسك شيء إلا إنك تستجيب ، و إذا ما إستجبتش هيكون الثمن غالي جداً جداً ، فإستجيب ، ماتخفش ، إستجيب ماتخفش ، (أم جعلوا لله شركاء خلقوا كخلقه فتشابه الخلق عليهم) يعني الآلهة الباطلة دي خلقوا زي ما ربنا خلق ، أبداً ماحصلش ، ماحصلش ، مفيش حد خَلَقَ كَخَلَقَ الله أبداً ، ربنا هنا بيسأل سؤال إستنكاري : (أم جعلوا لله شركاء خلقوا كخلقه) يعني هم عبدوا آلهة أخرى غير الله أو مع الله ، خلقوا زي ما ربنا خلق؟؟؟ أبداً ، ماحصلش ، (أم جعلوا لله شركاء خلقوا كخلقه فتشابه الخلق عليهم) يعني هم دلوقتي مش عارفين خلق ربنا من خلق الآلهة المشتركة دي؟؟؟؟ ماحصلش ، (قل الله الخالق كل شيء) ربنا خلق كل شيء ، صفة الخلق هي لله ، (و هو الواحد القهار) الواحد : مفيش غيره ، القهار : يعني يسجد له من في السماوات و الأرض طوعاً و كرهاً ، هو ده معنى القهار ، ربنا أجمل الصفة دي هنا في الكلمة دي ، يعني (و لله يسجد من في السماوات و الأرض طوعاً و كرهاً و ظلالهم بالغدو و الأصال) جمعها في كلمة القهار ، (و هو الواحد القهار) .

{أَنْزَلَ مِنَ السَّمَاءِ مَاءً فَسَالَتْ أَوْدِيَةٌ بِقَدَرِهَا فَاحْتَمَلَ السَّيْلُ زَبَدًا رَابِيًا وَمِمَّا يُوقِدُونَ عَلَيْهِ فِي النَّارِ ابْتِغَاءَ حُلْيَةٍ أَوْ مَتَاعٍ زَبَدٌ مِثْلُهُ كَذَلِكَ يَضْرِبُ اللَّهُ الْحَقَّ وَالْبَاطِلَ فَأَمَّا الزَّبَدُ فَيَذْهَبُ جُفَاءً وَأَمَّا مَا يَنْفَعُ النَّاسَ فَيَمْكُثُ فِي الْأَرْضِ كَذَلِكَ يَضْرِبُ اللَّهُ الْأَمْثَالَ} :

خلي بالك بقى من المثل الجاي ده ، ربنا ضرب مثال تاني هنا ، بيوضح به سبيل المؤمنين و سبيل الكافرين ، سبيل أهل الله و أهل الروح و سبيل أهل الدنيا (أنزل من السماء ماء) أي من سماوات الوحي ، و كذلك السماء تُنزل المياه على رؤوس الجبال و ثم تجري الأودية فتُكون الأنهار ، مش إحنا عارفين كده؟ خلي بالك ، (أنزل من السماء ماءً فسالت أودية بقدرها) دائماً كده (سالت أودية بقدرها) ، المؤمن كده إيه ، طبيعته إيه؟ مطيع كالمياه ، (بقدرها) أي بفعلها ، بفعل السماء ، و تلك المياه النازلة يعني ، و بعد كده حصل إيه بقى؟ لما تكونت الوديان و الأنهار؟؟ خلي بالك من المثل العظيم ده ، ربنا هنا بيبيّن و يُعطيك مثال : الفرق بين الحق و الباطل ، الفرق ما بين المؤمن و الكافر ، (فاحتمل السيل زبدًا رابيًا) السيل اللي هو مجرى النهر ، يبقى سيل كده ماشي بقوة ، و فوق السيل ده ، طافي كده عليه رغاوي بيضا كده ، عالية كده ، رغاوي إسمها الزبد ، (فاحتمل السيل زبدًا رابيًا) فاحتمل يعني إيه ، الزبد فوق محمول على السيل ، ظاهر يعني ، (فاحتمل السيل زبدًا رابيًا) رابيًا يعني عاليًا ، من ربوة ، صوته عالي و لكن ليس له قيمة أو فائدة ، دائماً كده الباطل إيه؟؟؟ صوته عالي ، زبد ، ربنا وصفه بالزبد ، الزبد هو إيه؟ حتمية المعصية ، إزاي؟؟ زبد : الزين صوت الذنب ، بد أي بُد : حتمية ، إذا الزبد هي حتمية المعصية ، هتعمل إيه؟ الشكل ده ، هل الزبد ده الناس بتستفيد منه؟؟؟ مين اللي بيستفيد منه أو إيه هو الشيء اللي بنستفيد منه؟؟؟ المية/الماء هي اللي بتتبت الزرع و بتروي العطش ، صح؟؟ و هي اللي بتخلي مجرى النهر زي ما هو ، المية ، السيل هو اللي بيرسم مجرى النهر و بيحافظ على المجرى ده ، لكن هل الزبد بيحافظ على مجرى النهر؟؟؟ هل الزبد ده إحنا بنستفيد منه؟؟؟ كذلك الباطل ، مالوش أي قيمة ، طيب شووف بقى المثال التاني ده على وصف الحق و الباطل ، المقارنة ما بين الحق و الباطل ، و المقارنة ما بين المؤمن و الكافر ، خلي بالك ، خلي بالك (و مما يوقدون عليه في النار ابتغاء حلية أو متاع زبد مثله) لما بيحبوا شوية أحجار كده من منجم و يسيحوها/يصهروها في النار فيطلع منها ذهب أو يطلع منها فضة أو يطلع منها نحاس ، معدن ، و المعادن دي من خلى الدنيا أو من متاع الدنيا ، من الأمور الدنيوية اللي الناس تتصارع عليها ، أمور مادية الناس بتتصارع عليها ، فربنا قال كده ، قال إن الزبد ده ، اللي هو مالوش أي قيمة ده ، اللي هو متاع الدنيا ، اللي هو لا يُساوي شيء في ميزان الله عز و جل ، كذلك هو زي الخلي دي اللي بتخرج بسبب النار ، نار النفوس ، نار المعصية ، نار الرياء و الكذب و الحسد ، نار ، فالنار دي هي اللي بتخرّج الخلي دي ، متاع الدنيا ، اللي الناس بتتصارع عليها ، ربنا قال الخلي دي زيها زي الزبد ، ليس لها أي قيمة ، حتى و لو إنتو شايفين إن لها قيمة ، لأنها بتخرج من النار و تأتي بالنار ، (كذلك يضرب الله الحق و الباطل) كذلك يضرب مثال على الحق و مثال على الباطل عشان تستبين لكم السبيل ، سبيل الحق ، (و مما يوقدون عليه في النار ابتغاء حلية أو متاع زبد مثله) متاع الدنيا كله زبد ، الخلي كلها اللي بتطلع من النار و من نار المعصية زبد ، أي فيها حتمية المعصية ، لازم ، أي متاع الدنيا الناس بتتصارع عليه ، لازم تكون فيه حتمية المعصية ، لازم ، فلذلك الدنيا ألقها في نحر من يطلبها ، لو حد أتى يُصارعك على دنيا ، ألقها في نحره عشان تخلص ، لأن التصارع هيعمل

حتمية المعصية ، إيه هي حتمية المعصية؟؟ زبد ، الزبد : الزين صوت الذنب ، بد أي البُد ، (كذلك يضرب الله الحق و الباطل) ، مصير بقى الحق و الباطل (فأما الزبد) الباطل ده (فيذهب جفاء) يعني يذهب سُدى ، ليس له أي قيمة و لا ميزان في عالم الروح ، كذلك جُفاء أي يأتي بالجُفاء ، يأتي بقسوة القلوب ، يأتي بنزع الرحمات ، جُفاء أي من القسوة ، كذلك جُفاء أو جُفاء من جيفة ، متاع الدنيا هو جيفة ، جيفة ، كما مُثِلت الدنيا كأنها إيه؟ جيفة حمار أو جيفة كائن ميت ، هي دي الدنيا ، الناس لتتصارع عليها ، بتتصارع على هذه الجيفة ، فلذلك ربنا قال إيه (فأما الزبد فيذهب جفاء) مصيره إيه؟ أصلاً حقيقته إيه؟ جيفة ، حقيقة الأمر هي المصير ، أي شيء حقيقته هي إيه؟ المصير ، الخاتمة ، القيامة الكبرى ، هي دي المصير ، هي دي الحقيقة الكبرى ، اللي ربنا هيُحيل لها كل شيء في الآية الأخيرة ، و هنفهم بقى دلوقتي الثمن ، هنفهم الثمن ، الثمن يعني ، (فأما الزبد فيذهب جفاء) يبقى إيه ، مصيره جيفة ، كذلك يأتي بالجُفاء و القسوة ، جُفاء أي إيه؟ سُدى ليس له أي قيمة ، (و أما ما ينفع الناس) دعوة الحق ، دعوة النبيين هي التي بتنفع الحق ، التي تنفع الناس ، (و أما ما ينفع الناس فيمكث في الأرض) المية/الماء بقى بتنزل و تروي الأرض العطشانة ، و تطلع/تُخرج الزرع و تروي العطاشى أو العطشى ، (كذلك يضرب الله الأمثال) ربنا بيصف نفسه إنه ضارب للأمثال ، و دي صفة بيعتز بها ، يفخر بها ، كذلك نحن نفخر بهذه الصفة و نحن نسير على مسير الله عز و جل ، دائماً كده نضرب الأمثال ، نُقرب الصورة للأفهام و هي من دعوة الحق ، من دعوة الحق إن إحنا إيه؟ بنضرب الأمثال و نعتبر بالأمثال في الصحف السابقة .

{الَّذِينَ اسْتَجَابُوا لِرَبِّهِمْ الْحُسْنَى وَالَّذِينَ لَمْ يَسْتَجِيبُوا لَهُ لَوْ أَنَّ لَهُمْ مَا فِي الْأَرْضِ جَمِيعًا وَمِثْلَهُ مَعَهُ لَافْتَدَوْا بِهِ أُولَئِكَ لَهُمْ سُوءُ الْحِسَابِ وَمَأْوَاهُمْ جَهَنَّمُ وَبِئْسَ الْمِهَادُ} :

(الذين استجابوا لربهم الحسنى) اللي إستجاب بقى لدعوة النبي ، اللي هي من الله عز و جل ، النتيجة إيه؟ الحُسنى ، حُسنى : حاء راحة ، سنى أي رُقي و ترقى ، كذلك الجنان هي رُقي و ترقى في عالم الروح ، هو السنى و السناء ، حُسنى : الحاء راحة ، سنى أي الترقى ، فكذلك المترقى في عالم الروح يشعر براحة أبدية ، و الحُسنى أي من الإحسان الذي هو ثمن الجنان المتعاقبة التي لا تنفذ و التي لا تنتهي أبداً ، الحُسنى أي الإحسان ، و كذلك الحُسنى هي وصف لذلك المتاع العظيم ، المتاع الروحي العظيم ، حاء راحة ، سنى أي ترقى ، (الذين استجابوا لربهم الحسنى) إذاً الحُسنى شفنا فيها كذا معنى إزاي ، كلمة فيها عالم من المعاني ، (و الذين لم يستجيبوا له) اللي ما إستجابوش للنبي ، (لو أن لهم ما في الأرض جميعاً) لمجرد إنهم ما إستجابوش بس أو أعرضوا عنه أو ما إهتموش به ، مش كمان عادوه ، لا بس ما إستجابوش كده ، زي ناس إحنا عارفينهم ، لمجرد أنه أعرض و ما إستجيش ، تخيل؟؟ خلي بالك مصيره هيبقى إيه ، يوم القيامة بقى (لو أن لهم ما في الأرض جميعاً) كل المتاع اللي فات ده ، بتاع الأرض كله ، كل المتاع اللي في الأرض ، في الدنيا ، (لو أن لهم ما في الأرض جميعاً و مثله معه) مضاعف كمان ، (لافتدوا به) هيكونوا في حالة نفسية أليمة جداً و مخيفة جداً ، لدرجة إن هم لو معهم مال الدنيا كله و مثله معه ، هيفدوا أنفسهم به و يخرجوا من المأزق اللي هيكونوا فيه يوم القيامة ،

يبقى ربنا هنا بيصف مشهد مستقبلي في يوم القيامة الكبرى عن حال الكافرين الذين لم يستجيبوا للرسول ، هيكونوا في مأزق عظيم ، فهنا ربنا بيصف المشهد ده عشان ما نقعش في عدم الإستجابة ، عشان يحفزنا أن نستجيب للرسول ، (أولئك لهم سوء الحساب) حسابهم سيء جداً ، و بعدين (و مأواهم جهنم) هتكون بيتهم اللي هيسكنوا فيه ، (و مأواهم جهنم) هتعمل فيهم إيه؟ (و بئس المهاد) تمهيد بئس جداً ، هيكونوا في بؤس عظيم ، هذا البؤس يُمهد نفوسهم المظلمة ، يُمهد نفوسهم القاسية ، يُمهد نفوسهم الجيفة ، يُمهد نفوسهم الجافية ، في نفوس ماتنفعش معها إلا النار ، عياداً بالله ، نفوس خبيثة من جنس متاع الدنيا الخبيث ، اللي مابيخرجش إلا بالنار ، الذهب و النحاس و الفضة ما بيخرجوش من الصخور إلا لما الصخرة دي تتسيح/تنصهر في النار ، كذلك في نفوس كده قذرة ، (كالحجارة أو أشد قسوة) ما تتمهدش إلا لما تتعرض لنار جهنم ، عياداً بالله ، عياداً بالله ، فالمؤمن هو مثل إيه؟ السيل ، الماء النازل من السماء على رؤوس الجبال ، لذلك مشهد الجبل مع المية من المشاهد اللي بحبها جداً ، لأنها تمثل مادي لحقيقة روحية ، الجبل الذي يتخلله الماء من المشاهد التي أحبها ، ليه؟ لأنها ده أصلاً مشهد روحاني ، مية نازلة على جبل ، جبل يعني توحيد ، ماء يعني وحي ، أنهار يعني مؤمنين و دعوة الحق ، بحر يعني كلمات الله ، اللي هي دعوة ربنا سبحانه و تعالى .

• و أثناء تصحيح نبي الله الحبيب يوسف الثاني ﷺ لتلاوتنا ، قال لنا :

- {قُلْ مَنْ رَبُّ السَّمَاوَاتِ وَالْأَرْضِ قُلِ اللَّهُ قُلْ أَفَاتَّخَذْتُمْ مِنْ دُونِهِ أَوْلِيَاءَ لَا يَمْلِكُونَ أَنْفُسِهِمْ نَفْعًا وَلَا ضَرًّا قُلْ هَلْ يَسْتَوِي الْأَعْمَى وَالْبَصِيرُ أَمْ هَلْ تَسْتَوِي الظُّلُمَاتُ وَالنُّورُ أَمْ جَعَلُوا لِلَّهِ شُرَكَاءَ خَلَقُوا كَخَلْقِهِ فَتَشَابَهَ الْخَلْقُ عَلَيْهِمْ قُلِ اللَّهُ خَالِقُ كُلِّ شَيْءٍ وَهُوَ الْوَاحِدُ الْقَهَّارُ} طبعاً الآية دي رد على الكفار و رد على المسيح الدجال المجرم ، و رد على أتباعه المجرمين و المشركين و الضالين اللي بيقولوا إن عيسى خلق شوية طيور كده ، و دلوقتي إحنا مانعرفش نفرق ما بين الطيور اللي خلقها عيسى و الطيور اللي خلقها ربنا ، كذايين و مجرمين ، ربنا هو خالق كل شيء ، هو خالق عيسى ، تمام ، خلاص كده؟ ، طبعاً الطيور اللي كان بيحركها عيسى من الطين دي ، كانت آية وقتية ، كانت لا تلبث الطيور من الطين دي تتفرق و تتحول إلى تراب مرة أخرى ، و ده فن في الهند ، المسيح الموعود ﷺ إتكلم عنه ، كان سماه فن التراب (المسمارزم) و ده فن موجود في الهند قديماً ، و هو يناسب العقول البدائية ، كذلك العلامة اللي جنب كلمة الأصل اللي مروان سأل عليها ، دي إيه؟ للإشارة أن الآية دي فيها سجدة ، يعني تسجد أول ما تقرأها ، إن تيسر لك ، ليه؟ عشان يبقى تمثّل مادي لحقيقة روحية ، إنت بتقول لربنا أنا طائع لك و بسجد لك ، ف دي علامة المحراب ، اللي هو إيه؟ إتجاه القبلة ، سُمي محراباً لأنه يُحارب الشيطان بسجودك في هذا الإتجاه أو في تلك القبلة ، أنت تحارب الشيطان ، و أنت في معركة مستمرة مع إبليس اللعين و أتباعه ، حتى تُسلم الروح لله عز و جل ، مؤمن في معركة مستمرة ، المؤمن منتصر و في معركة مستمرة ، معركة روحية مستمرة ، و بالتالي الإنسان لا يأمن حتى يُسلم الروح لله عز و جل ، نسأل الله حُسن الختام .

- (فسالت أودية بقدرها) قدر مين؟ قدر السماء ، قدر الماء ، قدر الله عز و جل الذي أعطى هذا الوحي ، قدر تلك الكلمات ، (أنزل من السماء ماءً فسالت أودية بقدرها) أي بكلماتها أو بتلك الكلمات الإلهية العظيمة ، (فسالت أودية) أودية من الروح و الإيمان ، و كلمة (قدرها) أي كلماتها ، و كلمات ربنا هي إيه؟ قدر يتنزل ، منه اللي يُستنزل بالدعاء و منه اللي يبقى مُبرم و معاده/ميعاده معروف اللي هي شمعات فيصلة على الطريق معنونة ، اللي هي دعوى النبوة ، مش مقام النبوة ، الدعوى دي شمعات فيصلة على الطريق معنونة ، معادها/ميعادها معروف و محدد و قدر مُبرم مكتوب في اللوح المحفوظ ، هيجصل هيجصل ، فلذلك ربنا وصف الكلمات (أنزل من السماء ماءً فسالت أودية بقدرها) .

و اختتم نبي الله الجلسة المباركة بقوله المبارك :

هذا و صلّ اللهم و سلم على نبينا محمد و على آله و صحبه و سلم ، سبحانك اللهم و بحمدك ، أشهد أن لا إله إلا أنت ، أستغفرك و أتوب إليك .

و الحمد لله رب العالمين . و صلّ يا ربي و سلم على أنبياءك الكرام محمد و أحمد و يوسف بن المسيح صلوات تلو صلوات طيبات مباركات ، و على أنبياء عهد محمد الآتين في مستقبل قرون السنين أجمعين . آمين .  

درس القرآن و تفسير الوجه الرابع من الرعد .

أسماء إبراهيم :

شرح لنا سيدي و حبيبي يوسف بن المسيح ﷺ أثناء جلسة التلاوة المباركة من أحكام التلاوة ؛ الوقف و السكت , ثم قام بقراءة الوجه الرابع من أوجه سورة الرعد ، و أجاب على أسئلتنا بهذا الوجه ، و أنهى نبي الله الحبيب الجلسة بأن صحح لنا تلاوتنا .

بدأ نبي الله جلسة التلاوة المباركة بقوله :

الحمد لله ، الحمد لله وحده ، الحمد لله وحده و الصلاة و السلام على محمد و من تبعه من أنبياء عهده و بعد ، لدينا اليوم الوجه الرابع من أوجه سورة الرعد ، و نبدأ بأحكام التلاوة و مروان :

الوقف :

ج (وقف جائز) , قلي (الوقف أفضل لكن الوصل جائز) , صلي (الوصل أفضل لكن الوقف جائز) ,

لا (ممنوع الوقف) , ما (وقف لازم) , وقف التعانق و هو لو وقفت عند العلامة الأولى فلا تقف عند العلامة الثانية و لو وقفت عند الثانية لا تقف عند الأولى) .

و السكت :

هو حرف السين ، و هو وقف لطيف دون أخذ النفس ، مثل : من راق ، بل ران .

و بعد مروان قالت الأحكام رفيدة ثم أرسلان .

و ثم تابع نبي الله يوسف الثاني ﷺ الجلسة بشرح الوجه لنا فقال :

هذا الوجه ، وجه عظيم ، و كل أوجه القرآن عظيم ، يقول تعالى سبحانه :

{أَفَمَنْ يَعْلَمُ أَنَّمَا أُنْزِلَ إِلَيْكَ مِنْ رَبِّكَ الْحَقُّ كَمَنْ هُوَ أَعْمَىٰ إِنَّمَا يَتَذَكَّرُ أُولُوا الْأَلْبَابِ} :

(أفمن يعلم أنما أنزل إليك من ربك الحق كمن هو أعمى) ربنا بيصف هنا إيه؟ مقارنة ما بين الكافر و المؤمن ، ما بين المؤمن و الكافر ، الذي عرف أن النبي حق و أنه مبعوث من الله الحق مبصر ، مبصر على الحقيقة ، و الذي كفر بالنبي و كذب به و أعرض عنه هو أعمى ، أعمى على الحقيقة ، أي أن حقيقة البصر هو أن تعرف نبي الزمان ، و حقيقة العمى هي أن تكذب نبي الزمان ، هذا هو الإبصار الحق و ذاك هو العمى الحقيقي ، و قلت الحق لأن الإبصار حق ، لأنه لا يكون إلا بنور الله عز و جل ، و قلت العمى الحقيقي أي أنه العمى الحقيقي و ليس الحق لأن العمى ليس بحق ، (إنما يتذكر أولوا الأبواب) خلي بالك ، المؤمن لما يؤمن بالنبي ، بنبي الزمان ، هو كده بيتذكر إيمانه به في الميثاق لما ربنا أخذ الميثاق من بني آدم ، إن هم يؤمنوا بالله و رسله و لا يشركوا به شيئاً ، كل واحد فينا آمن في الميثاق أي في إيمان الفطرة في ذلك العالم الذي خلقه الله ، في عالم الغيب ، و لما يأتي نبي الزمان ، يادوبك إنت تتذكر إيمانك السابق ، إنت أصلاً مؤمن بالفطرة ، منهم من يتذكر و منهم من لا يتذكر ، تكون على قلبه الحُجب و الران ، و الران هو صفة لتكاثر الذنوب في القلب ، لأن كل ذنب يُعرض على القلب كالحصير ، عوداً عوداً ، أيما قلبٌ قبل تلك المعصية نُكتت في قلبه نكتة سوداء حتى يصبح أسود مبراد كالكوز المجخية ، لا يقبل معروفاً و لا ينكر منكراً ، عايش كالحيوان ، بهيمة ، عايش كده ياكل و يشرب و خلاص ، و يمكن أقل من البهيمة كمان ، اللي بيبقى قلبه أسود مبراد ده ، كالكوز المجخية لا يقبل معروفاً و لا ينكر منكراً ، و هذا وصف النبي ﷺ لحال المكذبين ، خلي بالك بقى (إنما يتذكر) يبقى هنا المؤمن تذكر إيمانه الأول في الميثاق ، شوفت بقى ، خلي بالك ، (إنما يتذكر أولوا الأبواب) هنا وصف المؤمن بأنه لبيب ، لبيب يعني إيه؟ ذكي يعني و فهيم و نبیه؟ ممكن آه طبعاً ، لأن المؤمن عنده فراسة و عنده حس ، إحساس فطري ، بيعرفه الحق من الباطل لأن ميزانه معدول ، كذلك المعنى العظيم بقى اللي عاوز أقوله دلوقتي ، (أولوا الأبواب) يعني أصحاب اللب ، يعني الباطن ، أصحاب البواطن ، اللي هم بيفهموا الأسرار الدنيوية ، بيفهموا الأسرار الإلهية ، اللي عندهم العرفان الإلهي ، اللي عندهم العرفان الرباني ، لأن إحنا دايماً بنقول أن الدين دين باطني ، لأن الدين كله أسرار ، لأن الله خفي و لطيف ، و وصاله خفي و لطيف ، و وحيه بنا خفي و لطيف ، فلذلك الدين فيه أسرار عظيمة جداً ، أسرار تُريح النفس الإنسانية ، النفس الإنسانية دي باطن من البواطن العجيبة ، التي فيها أسرار كثيرة جداً ، لا يعلمها و لا يعلم كنهها و لا يعرف أن يتصرف معها إلا الله ، فبالتالي وصف الله سبحانه و تعالى المؤمنين بأنهم (أولوا الأبواب) أصحاب البواطن ، أصحاب البواطن السليمة ، أصحاب البواطن الطاهرة النقية ، عرفتموا يعني إيه ألباب؟؟ دي قرينة أهي و دليل إن الدين دين باطني ، و إن المثال اللي ربنا شبه به المؤمن بأنه بصير و أن الكافر بأنه أعمى ، ده مجاز ، يبقى في القرآن مجاز أهو صح؟؟ ماشي .

{الَّذِينَ يُوفُونَ بِعَهْدِ اللَّهِ وَلَا يَنْفُضُونَ الْمِيثَاقَ} :

ربنا هنا بيكمل وصف للمؤمنين هؤلاء ، بأنهم أوفياء ، أوفياء ، فيهم الوفاء و فيهم المحبة ، وفاء و محبة ، (و لا ينقضون الميثاق) يعني لما يبايعوا ، لا يفك البيعة ، صادق ، ليس بخائن و لا غدار ، و الميثاق اللي هو إيه؟ العقد الغليظ ، العهد الغليظ ، و العهد القوي ، و العهد المعقود بقوة ، و هي البيعة أي أن تبيع نفسك لله على يد نبي الزمان ، هي دي معنى البيعة ، ميثاق من إيه؟ من الثقة و من الوثاق القوي ، إذا الميثاق هنا أتت من معنيين : ميثاق أي من الثقة ، إنه واثق ، واثق في الله ، واثق في نبي الزمان ، كذلك ميثاق أي من الوثاق أي رباط قوي ، رباط قوي بينه و بين الله من خلال نبي الزمان ، و كلمة نقض حد يعرف يقولها من أصوات الكلمات؟ سهلة خالص ، نقض : نون نعمة ، القاف قوة ، الضاد تشتت فظ أليم ، إذا تشتت فظ أليم بقوة للنعمة ، هو ده النقض ، هو ده نقض الميثاق ، تمام كده .

{وَالَّذِينَ يَصِلُونَ مَا أَمَرَ اللَّهُ بِهِ أَنْ يُوصَلَ وَيَخْشَوْنَ رَبَّهُمْ وَيَخَافُونَ سُوءَ الْحِسَابِ} :

(و الذين يصلون ما أمر الله به أن يوصل) بيستمر ربنا هنا في وصف المؤمن ، في وصف المؤمنين ، (و الذين يصلون ما أمر الله به أن يوصل) إنك تتصل بالله و بنبي الزمان ، تتصل بصفة الإحسان ، اللي هي كلمة السر في التعاقب بالجنان المتتالية ، هنشوفها دلوقتي ، (و الذين يصلون ما أمر الله به أن يوصل) و إيه ثاني؟؟ (و يخشون ربهم و يخافون سوء الحساب) هنا بقى نعمل مقارنة ما بين الخشية و الخوف ، إيه الفرق ، حد يعرف؟ حد يعرف الفرق بين الخشية و الخوف؟؟ الإثنين لهم تقريباً دلالة واحدة بس في فرق ما بينهم ، حد يعرف؟ حد يعرف؟ الخشية : هي التي تكون آنية و تكون إيه؟ تورث الخشوع ، و تكون إيه؟ خشية غالباً بتبقى في الأمور الحسنة و الطيبة و الأمور البارة ، خشية ، دايماً كده ربنا بيصف المؤمنين إنهم إيه؟ يخشون ربهم ، خشية ، هكذا الأنبياء و الأولياء و الصالحين و المؤمنين ، فيهم خشية ، من الإيه؟ من الخشوع ، لأن الخشية تورث الخشوع ، اللي هو الخشوع لله ، خضوع برضا ، خضوع بإيه؟ برضا ، هذه هي الخشية ، خشى ، (و يخافون سوء الحساب) الخوف ، دايماً كده بيكون من أمر مستقبلي ، غالباً كده ، إذا الخشية يكون أمر آني ، أمر آني يورث الخشوع ، يورث الخشوع ، و يكون خوف برضا ، فيه خشوع و فيه طيبة و فيه نقاء و صفاء ، هي دي الخشية ، لكن الخوف ، الخوف برضو/أيضا ، هو يكون من أمر مستقبلي ، و يجمع ممكن ما بين خوف حسن و خوف سيء ، خوف حسن : إن تخاف من سوء الحساب يوم القيامة ، تخاف من النار ، تخاف من العذاب ، ده خوف حسن ، تخاف من عقاب الله ، تخاف من الذنب و آثار الذنب ، تخاف من الظلم و آثار الظلم في الدنيا و الآخرة ، هذا خوف حسن ، و كذلك هناك خوف سيء ، أن تخاف على أمور تافهة ليس لها قيمة ، أمور دنيوية تافهة ليس لها قيمة ، أن تخاف مثلاً من أن يفوت الإنسان معصية معينة فهذا خوف مذموم ، أما الخوف من الله عز و جل ، خوف بمحبة يعني ، و الخوف من عقاب الله يورث التقوى ، أن تجعل بينك و بين عذاب الله وقاية ، إذا عرفنا الفرق بين الخشية و الخوف؟؟ الخشية

أمر أني يورث الخشوع ، و الخوف هو من أمر مستقبلي ، يشمل الأمر الحسن و الأمر السيء ، (و يخافون سوء الحساب) خلي بالك في الكلمة دي ، (سوء الحساب) و قال لك هنا ، برضو في الوجه (سوء الدار) ، (سوء الحساب) يعني حساب واحد بس لكل كون ، هنتاسب مرة واحدة في القيامة الكبرى ، (سوء الدار) هي دار سيئة واحدة ، جهنم واحدة بس و هتزلزل و هتفنى ، لكن ماقلش كده عن الجنان المتعاقبة ، هنعرف إزاي دلوقتي ، إذا دي قرينة على فناء النار و إن الحساب مرة واحدة بس لكل كون ، (و يخافون سوء الحساب) ربنا يعافينا ، نسأل الله حسن الختام .

{وَالَّذِينَ صَبَرُوا ابْتِغَاءَ وَجْهِ رَبِّهِمْ وَأَقَامُوا الصَّلَاةَ وَأَنفَقُوا مِمَّا رَزَقْنَاهُمْ سِرًّا وَعَلَانِيَةً وَيَدْرُؤُونَ بِالْحَسَنَةِ السَّيِّئَةِ أُولَٰئِكَ لَهُمْ عُقْبَى الدَّارِ} :

(و الذين صبروا ابتغاء وجه ربهم) ربنا سبحانه و تعالى هنا بيستمر في وصف المؤمنين ، إن عندهم صبر ، صبر : صاد بر أي صلة البر ، دائماً ، صبر وصل البر أو إتصل بالبر و هو الإحسان يعني ، غالباً ، لأن الإحسان يحتاج إلى صبر ، من مقومات الإحسان إيه؟ و من قواعد الإحسان إيه؟ الصبر ، سورة العصر ، مبدأ و قانون سورة العصر ، (و الذين صبروا ابتغاء وجه ربهم) صبروا عشان إيه؟ (إبتغاء) طلب ، طلب إيه؟ وجه ربهم ، يعني إيه (إبتغاء وجه ربهم)؟؟ حاجتين ، حاجة في الدنيا ، و حاجة في الآخرة ، (إبتغاء وجه ربهم) يعني طلب إن هم يشوفوا وجه الله عز و جل في الجنة و ده أعظم نعيم أهل الجنة ، حلو أوي أوي ، ده المعنى الأخروي ، المعنى الدنيوي بقى : (إبتغاء وجه ربهم) إن هم بيتغوا إن إيه ، صفات ربنا تكتمل عند البشر ، يعني إيه؟ الناس تفهم هذا الإله و تتعرف على هذا الإله فالصورة تبقى واضحة عند الناس ، يعني حتى يكتمل وجه القمر في الدنيا ، القمر هو رمز المهدي ، و إذا اكتمل وجه القمر إكتملت الرؤيا عند الناس بخصوص صفات الله عز و جل فيتعرفوا على الله حق المعرفة ، على يد المهدي ، اللي هو وجه القمر ، (و الذين صبروا ابتغاء وجه ربهم) صبروا عشان يكتمل وجه ربنا في الدنيا عند الناس ، الناس تتعرف على ربنا ، فصبروا عشان الدعوة ، بأنهم يبلغوا دعوة الأنبياء ، كذلك صبروا عشان بيتغوا رؤية وجه ربنا في الجنة ، اللي هو أعظم نعيم أهل الجنة ، شفتوا بقى المعنيين؟؟

(و الذين صبروا ابتغاء وجه ربهم) و إيه تاني؟؟ (و أقاموا الصلاة) الصلاة ، و كذلك الصلوات المكتوبة ، الصلاة مع الله عز و جل ، (و أنفقوا مما رزقناهم) الصدقة ، الإنفاق ، الصدقة تطفئ غضب الرب ، و الصدقة تمحو الذنب ، و الصدقة تطفئ نار الخطيئة ، (و أنفقوا مما رزقناهم سراً و علانية) في السر و العلانية ، و ربنا قَدَمَ السر لأن ربنا بيحب الأعمال و الصدقات تكون مخفية ، عشان حاجتين : نمنع أنفسنا من الرياء و نحتمي من الرياء ، اللي هو شرك خفي ، اللي هو نوع من أنواع الشرك الخفي ، و كذلك نحافظ على كرامة المسكين أو الفقير اللي إحنا بنتصدق عليه ، هو ده فائدة السر ، و علانية برضو ، عادي لو علانية ماشي ، بس الأفضل السر ، ماشي ، إذا السر ده الفاضل و العلانية هو المفضول ، يعني زي الراجح و المرجوح ، الأولي هو السر ، من صفات المؤمنين إيه بقى؟ (و يدروون بالحسنة السيئة) عندهم الإحسان

، شوفت بقى الإحسان أهو ، كلمة السر و المفتاح اللي هيدخلك الجنة و يخليك تخلص فيها إلى ما لا نهاية ، تتعاقب في الجنات المتتاليات للأكوان التالية إلى ما لا نهاية ، الإحسان ، و في ناس ، لا ، مش هيعبروا ، يخشوا/يدخلوا النار و بعد كده يخرجوا و يخشوا جنة واحدة بس و بعد كده يفنوا ، بنص كلام المهدي الحبيب ﷺ و بنص القرآن الكريم ، (و يدروون بالحسنة السيئة) يعني بيزيلوا السيئة بالإحسان ، بالحسنة ، بمعنيين برضو ، يعني لما المؤمن ده يُسيء ، يعمل سيئة ، يتبعها بإحسان ، صدقة ، عمل طيب ، بر ، كذلك ، (و يدروون بالحسنة السيئة) يعني لما الواحد يُسيء لهم ، هم يُحسنوا له ، يبقى هنا معنيين ، الجزاء إيه؟ جزاء الإحسان إيه؟ (أولئك لهم عقبى الدار) أي دار متعاقبة ، عقبى يعني متعاقبة ، لا تنتهي ، زي السلسلة كده و الذرية ، يقول لك في عقبك أو عقباك يعني ذريتك متسلسلة كثيرة لا تنتهي عبر الزمان ، ده تشبيه يعني ، لكن الجنة رينا شبهها كأنها ذرية ، (عقبى) أي سلسلة لا تنتهي ، مش ربنا قال عن الجنة (و جعلناهم الوارثين) إن المؤمن يرث الجنة ، يرث ، زي ما ربنا بيرث الأرض و من عليها ، و ربنا يُورث الجنة للمحسنين ، سلسلة يعني ، سلسلة مستمرة ، (أولئك لهم عقبى الدار) أي الدار متعاقبة لا تنتهي ، عقب ، في سلسلة متتالية لا تنتهي .

{جَنَّاتٌ عَدْنٌ يَدْخُلُونَهَا وَمَنْ صَلَحَ مِنْ آبَائِهِمْ وَأَزْوَاجِهِمْ وَذُرِّيَّاتِهِمْ وَالْمَلَائِكَةُ يَدْخُلُونَ عَلَيْهِمْ مِنْ كُلِّ بَابٍ} :

وصفها إيه بقى (عقبى الدار) دي؟؟ (جنات) أهو بيقول أهو (جنات) يعني جنات متتاليات ، ورا بعض ، (جنات عدن) عدن يعني إيه؟ آه ، عدن أي تعدو في الزمان و لا تلتفت للزمان ، يعني الزمان بالنسبة لها و لا حاجة ، يعني إلى ما لا نهاية ، عدن أي إلى ما لا نهاية ، كذلك عدن أي مُعَدَّة ، عدن : عَدَّ أي أعد ، النون نعمة ، أي ما فيها من إعداد للنعمة ، معدودة النعمة أي معدة النعمة ، يعني مُهيئة النعمة ، مش إن معدودة يعني بسيطة أو قليلة أو محدودة ، لا ، من الإعداد ، تجهيز ، تجهزة النعيم المستمر ، تجهزة النعيم المقيم ، إذا عدن أي تعدو في الزمان و لا تلتفت للزمان ، أي أنها لا نهائية ، (يدخلونها و من صلح من آبائهم و أزواجهم و ذرياتهم) من تمام النعيم لما يكون من آبائك مؤمنين و من أزواجك مؤمنين و من ذرياتك مؤمنين ، ربنا يجمعهم عليك في الدرجة بتاعتك ، لو إن درجتك عالية يجوا معك إتماماً للنعمة ، يبقى ربنا أنعم علينا بإتمام لم الشمل ، عمل لنا لم شمل في الجنة ، لم شمل ، أسرتك أو أقاربك المؤمنين ، ربنا هيجمعهم عليك عشان تستأنس بهم في الجنة ، شايفين ربنا أد/قد إيه ودود و رحيم ، صح كده؟ ، عرفنا طبعاً عهد الله هو الميثاق و هو البيعة ، صح كده؟ و عرفنا الفرق ما بين الخشية و الخوف ، و عرفنا يعني (عقبى الدار) أي الديار المتعاقبة في جنات متتالية ، عقبى أي سلسلة كالذرية لا تنقطع ، و الديار متسلسلة لا تنقطع في الجنات ، و عرفنا معنى عدن أي عديدة تعدو في الزمان أي أنها لا نهائية بل متتالية ، (جنات عدن يدخلونها و من صلح من آبائهم و أزواجهم و ذرياتهم) إيه تاني بقى؟ حالهم عامل إزاي؟ (و الملائكة يدخلون عليهم من كل باب) كل باب جنة يدخلوها ، الملائكة يدخلوا معهم أو يدخلوا عليهم ، يعني يدخلوا يُباركوهم ، يدخلوا يعطروهم ، يدخلوا يُسعدوهم ، يُسعدوا قلوبهم ، لأن أثر

الملاك سعادة ، سعادة و خشوع و بركة و طيبة و عطر جميل ، ده أثر الملاك ، و أثر الشيطان -عياذاً بالله- النزغ و النزع و النار و الغيظ و الغضب و الحزن ، عياذاً بالله ، إذاً ده أثر الملائكة ، ربنا بيحط /بيضع عليهم أثر الملائكة (و الملائكة يدخلون عليهم من كل باب) .

{سَلَامٌ عَلَيْكُمْ بِمَا صَبَرْتُمْ فَنِعْمَ عُقْبَى الدَّارِ} :

حالهم إيه بقى؟؟ (سلام عليكم) عندهم سلام نفسي و سلام مادي و سلام في كل حاجة ، سَلَم و سلام ، (سلام عليكم) إيه بقى (بما صبرتم) إنكم صبرتموا ، وصلتوا البر ، صبرتموا الصبر الجميل ، اللي هو قاعدة من قواعد الإحسان ، (سلام عليكم بما صبرتم) صبر على أي حاجة بقى ، على أي ابتلاء ، على أي أذى ، على أي مرض ، عياذاً بالله ، على أي ابتلاء في الدنيا ، على أي تكذيب من الكافرين ، كل ده صبر على الإيذاء ، قاعدة عظيمة جداً من قواعد الإحسان و قواعد السلامة و قواعد السلام في الجنان ، في الجنات المتعاقبة ، الصبر ، و الصبر لا يأتي إلا بالخير في الدنيا و الآخرة ، (فنعم عقبى الدار) فنعم ، ربنا هنا بيمدح الجنات المتتاليات دي المتعاقبات ، اللي هي للمحسنين ، (فنعم عقبى الدار) يعني ما أعظمها من ديار متعاقبة جزاء للمحسنين ، (فنعم عقبى الدار) يعني زمان في السعدية و أنا صغير ، كان مثلاً لما حد يحب يمدح عمل معين ، يقول : و النعم ، و النعم بك ، مثلاً أنا عملت حاجة كويسة أو كنت شاطر في المدرسة ، يعني كنت جيد في المدرسة أو درجاتي كويسة ، يقولك : و النعم يا محمد ، و النعم بك ، و النعم بيا محمد ، واخد بالك إزاي ، فكلمة و النعم أو فنعم يعني ما أعظمك أو ما أحسن ما فعلت ، و النعم بك .

{وَالَّذِينَ يَنْقُضُونَ عَهْدَ اللَّهِ مِنْ بَعْدِ مِيثَاقِهِ وَيَقْطَعُونَ مَا أَمَرَ اللَّهُ بِهِ أَنْ يُوصَلَ وَيُفْسِدُونَ فِي الْأَرْضِ أُولَئِكَ لَهُمُ اللَّعْنَةُ وَلَهُمْ سُوءُ الدَّارِ} :

(و الذين ينقضون عهد الله من بعد ميثاقه) هنا بقى ربنا بيصف الكفة الثانية ، الطرف الثاني ، الطرف المكذب الكافر ، (و الذين ينقضون) عرفنا معنى النقض طبعاً ، (و الذين يتقضون عهد الله) يعني بيعة الله و كذلك ينقضون ميثاق الله الذي أخذه عليهم في الكشف العظيم ، (و الذين ينقضون عهد الله من بعد ميثاقه) بعد التوثيق ، سواء كان التوثيق الفطري أو إنه كان بايع نبي الزمان و ثم أخل بالبيعة ، ربنا هنا بيصف هذا العمل الكفري ، (و يقطعون ما أمر الله به أن يوصل) أي وصل الله و نبي الزمان ، (و يفسدون في الأرض) أي يُعادون الله و يُعادون نبي الزمان و المؤمنين ، (أولئك لهم اللعنة) عليهم لعنة ، لعنة ، يعني إيه لعنة؟ أي لعاعة تصيب أي نعمة عندهم ، لعنة : لع أي لعاعة ، النون نعمة أي لعاعة و ألم تصيب أي نعمة فهي لعنة ، شوفتوا بقى القرآن ، العربية دي لغة إلهامية ، و أي كلمة عُربت في القرآن ، ربنا بيُعطيها من الصفات دي ، من الصفة الإلهامية دي ، بيخلي في أصوات كلماتها معاني ، خلي

بالكم ، (أولئك لهم اللعنة و لهم سوء الدار) دار سيئة واحدة في الآخرة
يخشوها/يدخلوها و بعد كده يدخلوا الجنة و بعد كده يفنوا ، مالهومش تعاقب لأنهم
مش محسنين .

{اللَّهُ يَبْسُطُ الرِّزْقَ لِمَنْ يَشَاءُ وَيَقْدِرُ وَفَرَحُوا بِالْحَيَاةِ الدُّنْيَا وَمَا الْحَيَاةُ الدُّنْيَا فِي الْآخِرَةِ
إِلَّا مَتَاعٌ} :

(الله يبسط الرزق لمن يشاء و يقدر) ربنا هنا بيصف صفة من صفاته ، إن هو بيُعطي
رزق كثير لناس ، و بيَقْدِرُ أو بيقلل الرزق لناس تانيين ، (الله يبسط الرزق لمن يشاء
و يقدر) و الكلام ده في الدنيا و الآخرة ، في الدنيا ممكن ربنا يبسط الرزق للكافر ، و
يَقْدِرُ الرزق للمؤمن ، عادي و ممكن العكس ، ربنا يبسط الرزق للمؤمن و يَقْدِرُ يعني
يقلل الرزق للكافر ، ملهأش مقياس ، يعني هي حسب ربنا سبحانه و تعالى و حسب
حكيمته ، لأنه بيبقى حكيم و ده بيبقى من إيه؟ من مفردات و أساليب التربية الإلهية
الربانية للعباد ، بسط الرزق أو قدره أو تقليله ، ربنا بيبقى عالم بالحكمة و هو أعلم
منا ببواطن الأمور و أعلم منا بما هو أصلح لنا ، (الله يبسط الرزق لمن يشاء و يقدر)
دي صفات عامة لله عز و جل ، (و فرحوا بالحياة الدنيا) الكفار فرحوا بالحياة الدنيا ،
(و ما الحياة الدنيا في الآخرة إلا متاع) حياة الدنيا اللي عايشينها دي مقارنة بالآخرة ،
كأنها شربة مية ، كأنها أكلة أكلتها ، كأنها خروجة خرجتها في حياتك كلها ، فمفيش
مقارنة أصلاً ، فمفيش مقارنة بين الحياة الدنيوية دي و الآخرة ، حتى اللي هم مش
هيعقبوا أو يتعاقبوا في الجنات المتتالية ، الآخرة بالنسبة لهم أعظم كثير جداً من الدنيا
، صح؟ ، لأن أقل أهل الجنة نعيمًا ، هو آخر واحد بيخرج من النار و يدخل الجنة ،
ربنا يُعْطِيهِ أَدَقْدُ ملك الدنيا كلها مرتين ، كأنه مَلِكُ الدنيا اللي إحنا فيها دي ، الكرة
الأرضية يعني هو الملك فيها ، و عنده كل ثروات الأرض دي و اضرب بإثنين ، ده
أقل واحد في الجنة اللي هو آخر واحد خرج من النار ، فتخيل بقى ، تخيل حياة الدنيا
دي بالنسبة للآخرة إيه ، متاع ، و لا حاجة .

{وَيَقُولُ الَّذِينَ كَفَرُوا لَوْلَا نُزِّلَ عَلَيْهِ آيَةٌ مِّن رَّبِّهِ قُلْ إِنَّ اللَّهَ يُضِلُّ مَن يَشَاءُ وَيَهْدِي إِلَيْهِ
مَن يُنَاصِبُ} ؛

(و يقول الذين كفروا لولا أنزل عليه آية من ربه) دائماً كده ربنا بيصف الكفار بأنهم
بيميلوا إلى الآيات المادية ، اللي هي تكون أقرب لسلوك السحرة ، اللي إحنا بنشوفهم
دلوقتي في التلفجنز و كده ، أو هم بيعملوا أعمال سحرية زي كريس أنجل أو ديفد
كوبرفيلد أو كده ، هؤلاء يتبعهم الغوغاء و الضالين و أصحاب العقول التافهة و
السخفاء من القوم ، فدايمًا كده الكفار بيبقوا عاوزين حاجات مبهرة كده مادية ، آيات
مبهرة مادية ، (و يقول الذين كفروا لولا أنزل عليه آية من ربه) فربنا هنا بيذم الصفة
دي ، إيه هي؟ إنك تطلب آية مادية من النبي ، دي صفة مذمومة ، ربنا بيذمها ، ربنا

ما يحبهاش ، صح؟ ، لأن النبي ده مش ساحر يعني ، مش جاي يعمل أعمال بهلوانية ، و لا جاي يعمل فقرة ترفيحية للبشر أو للمؤمنين ، هو فايدة النبي إنه بيرفه عن المؤمنين أو بيعمل لهم فقرات ترفيحية ؟؟؟!!!!!! ، هي دي فايدة النبي ؟؟؟!!!!!! و لا/ أم إنه بيزكيهم و يُعطيهم الحكمة؟؟ ، يزكيهم و يعطيهم الحكمة ، بس ، (قل إن الله يضل من يشاء و يهدي إليه من أناب) اللي بيطلب آية مادية ده ضال ، ضال ليه؟ لأنه شاء أن يضل ، (قل إن الله يضل من يشاء) (من يشاء) يعني الكافر هو اللي شاء أن يضل باختياره ، (و يهدي إليه من أناب) ربنا بيهدي إليه من إختار الإنابة ، اللي إختار الخضوع لنبي الزمان ، اللي إختار التواضع ، اللي إختار الصبر ، اللي إختار حُسن الظن ، كل دي مؤسسات و قواعد للإحسان ، إنك تبقى بار ، متصل بالبر ، عشان تتصل بنبي الزمان و بالتالي تتصل بالله ، فيكتمل عندك وجه الله ، و يكتمل عندك وجه القمر ، فإنت دلوقتي تحاول تكمل وجه ربنا عند الناس ، تعرف الناس بالله عز و جل و تعرف الناس بالنبي ، فيكتمل وجه القمر .

{الَّذِينَ آمَنُوا وَتَطْمَئِنُّ قُلُوبُهُمْ بِذِكْرِ اللَّهِ أَلَا بِذِكْرِ اللَّهِ تَطْمَئِنُّ الْقُلُوبُ} :

(الذين آمنوا) ربنا بيصف المؤمنين هنا ، (الذين آمنوا و تطمئن قلوبهم بذكر الله) دائماً كده المؤمن لما يهْم عليه أمر ، يذكر الله أو يصلي ، فتلاقيه يستريح كده مع ذكر الله ، مثل الحي و الميت مثل الذي يذكر الله و الذي لا يذكر الله مثل الحي و الميت ، اللي يذكر ربنا ده حي ، الذي هو معرض عن ذكر الله هو ميت ، طبعاً دي كلها أوصاف مجازية ، زي المُبصر و الأعمى ، أوصاف مجازية ، المؤمن مُبصر ، و الكافر أعمى ، (الذين آمنوا و تطمئن قلوبهم بذكر الله) طبعاً كلنا مجربين الأمر ده ، ذكر الله ، جربنا لذته و نجرب بإستمرار لذة ذكر الله عز و جل ، لسي مجربين دلوقتي مع أذكار الصباح ، و دي أذكار إيه؟ محددة بزمان او مكان ، و في أذكار اللي هي الصلاة الوسطى ، مستمرة ، و هي أصلاً من ضمن الصلاة الوسطى ، الأذكار المحددة بالزمان أو المكان ، أو الأذكار المطلقة ، كلها تعتبر الصلاة الوسطى ، الصلاة العظيمة ، وسطى أي عظيمة ، كذلك هي ما بين الصلوات المكتوبات ، سُميت وسطى ، (الذين آمنوا و تطمئن قلوبهم بذكر الله) و من ضمن ذكر الله إيه؟ الدعاء اللي/الذي هو مخ العبادة ، أصل العبادة : الدعاء ، (ألا بذكر الله تطمئن القلوب) ربنا بياكد هنا تأكيد (ألا بذكر الله تطمئن القلوب) حد ماجربش؟؟ كلنا جربنا ، ذكر الله فعلاً بيجعل القلوب تطمئن ، و بيورث إيه؟ الخشوع و الخشية ، الخشوع ، إنك تحس إن إنت إيه ، غني ، تحس إنك مش محتاج حاجة من الدنيا مع الإحساس ده ، إحساس عظيم ، صح كده؟ .

و اختتم نبي الله الجلسة المباركة بقوله المبارك :

هذا و صلّ اللهم و سلم على نبينا محمد و على آله و صحبه و سلم ، سبحانك اللهم و بحمدك ، أشهد أن لا إله إلا أنت ، أستغفرك و أتوب إليك .

و الحمد لله رب العالمين . و صلّ يا ربي و سلم على أنبياءك الكرام محمد و أحمد و يوسف بن المسيح صلوات تلو صلوات طيبات مباركات ، و على أنبياء عهد محمد الآتين في مستقبل قرون السنين أجمعين . آمين .  

درس القرآن و تفسير الوجه الخامس من الرعد .

أسماء إبراهيم :

شرح لنا سيدي و حبيبي يوسف بن المسيح ﷺ أثناء جلسة التلاوة المباركة من أحكام التلاوة ؛ أحكام النون الساكنة و التنوين , ثم قام بقراءة الوجه الخامس من أوجه سورة الرعد ، و أجاب على أسئلتنا بهذا الوجه ، و أنهى نبي الله الحبيب الجلسة بأن صحح لنا تلاوتنا .

بدأ نبي الله جلسة التلاوة المباركة بقوله :

الحمد لله ، الحمد لله وحده ، الحمد لله وحده و الصلاة و السلام على محمد و من تبعه من أنبياء عهده و بعد ، لدينا اليوم الوجه الرابع من أوجه سورة الرعد ، و نبدأ بأحكام التلاوة و أحمد :

من أحكام النون الساكنة و التنوين :

الإظهار : أي أنه إذا أتى بعد النون الساكنة أو التنوين الحروف من أوائل الكلمات (إن غاب عني حبيبي همّني خبره) , و حروف الإظهار تجعل النون الساكنة أو التنوين تُظهر كما هي .

الإقلاب : إذا أتى بعد النون الساكنة أو التنوين حرف الباء يُقلب التنوين أو النون ميماً . ثم يكون إخفاء شفويا . مثال : من بعد .

و بعد أحمد قال الأحكام مروان ثم رفيدة ثم أرسلان .

○ و ثم طلب سيدي يوسف بن المسيح ﷺ من أحمد قراءة آية الكرسي ، و صحح له قراءته .

و ثم تابع نبي الله يوسف الثاني ﷺ الجلسة بشرح الوجه لنا فقال :

{الَّذِينَ آمَنُوا وَعَمِلُوا الصَّالِحَاتِ طُوبَى لَهُمْ وَحُسْنُ مَآبٍ} :

رينا هنا بيصف المؤمنين الذين أتبعوا إيمانهم بالعمل الصالح ، و يبين جزاءهم و ثوابهم و مصيرهم الجميل ، لأن حقيقة كل أمر هو إيه؟ المصير بتاعه ، حقيقة أي شيء؟ الخاتمة بتاعته ، و حقيقة أي أمر؟ المصير بتاعه ، مصير المؤمنين بقى اللي عملوا الصالحات إيه؟ طوبى ، طوبى ، طوبى دي كلمة عظيمة جداً ، وردت في القرآن مرة واحدة بس ، في الموضع ده ، نقدر نقول إنها مصدر كل الخيرات ، الكلمة دي ، ربنا عبر عن مصدر الخيرات و مصدر النعيم و مصدر الجزاء الحسن بكلمة طوبى ، طوبى ، تمام؟ ، و أشتق منها كلمات : طيبات ، طيب ، طيبون ، فالاشتقاقات دي ظهرت في القرآن كم مرة؟ عشرين مرة ، من كلمة طوبى : طيبات ، طيب ، الطيب ، الحاجة الطيبة هي الحاجة الحسنة و هي عكس الخبيث ، عياداً بالله ، إذاً طوبى هو مصدر الخير ، ربنا عبر عن مصدر الخير بطوبى ، و الرسول ﷺ عبر عن كلمة طوبى عشان يقربها للأفهام ، أنها شجرة في الجنة ، يسير الراكب في ظلها ٥٠٠ عام ، لا يقطعها ، و في راوية ١٠٠ عام لا يقطعها ، مش مهم السنين ، المهم إن ده لفظ مجازي يُظهر إن (طوبى) دي هي أصل الخير ، كلمة ، كلمة ربنا عبر بها عن أصل الخير ، أصل الخير في الجنة ، و إحنا عارفين طبعاً إن خير الجنة بفيض على المؤمنين في الدنيا ، عَرَفْهَا لَهُمْ ، مش ربنا قال عن الجنة (عَرَفْهَا لَهُمْ) فلازم المؤمن عشان يخش/يدخل الجنة ، لازم يعرفها في الدنيا قبل الآخرة ، لازم تيجيله/تأتيه فيوض من نسائمه ، لازم تيجيله فيوض من (طوبى) ، لازم (طوبى) تصَبِّح عليه في الدنيا ، عشان لما تصَبِّح عليه في الدنيا هيلاقىها في الآخرة ، هيلاقىها في الجنة ، إذاً (طوبى) هو مصدر الخير ، و لم تُرد في القرآن إلا في هذا الموضع ، عرفتوا يعني إيه (طوبى)؟؟ طوبى ، و نسمع عن كلمة تطويبات ، التطويبات يعني إيه؟ الخيرات أو التبريكات ، (طوبى) و وردت الكلمة دي في الكتاب المقدس ، طوبى تطويبات ، كما وردت في القرآن في إيه؟ في هذا الموضع من سورة الرعد ، (الذين آمنوا و عملوا الصالحات طوبى لهم و حسن مآب) (حُسْن) حُسْن يعني إيه؟ جمال ، و كمان حسن من إيه؟ من الإحسان ، إذاً مين اللي هيخش/هيدخل بقى إيه ، يلاقى طوبى و يعدي معها في الجنات المتعاقبة؟؟ المُحسن ، صح كده؟ و الإحسان عرفنا إنه له أنواع كثيرة متعددة ، صح؟ ، (مآب) اللي هو إيه؟ مرجع ، مصير يعني ، (مآب) يعني هو المصير ، حسن مصير (حسن مآب) ، رجوع ، و إيه ربنا عبر عنه بالرجوع أو بالأوبة؟ لأن إحنا أصلاً من ذلك العالم ، إحنا أصلاً إيه؟؟ من عند ربنا سبحانه و تعالى ، صح كده؟ فإحنا راجعين له تاني ، (مآب) رجوعنا تاني لله ، مِنَّا و العياد بالله ، من العالم و العياد بالله إيه؟ يدخل جهنم ، و منهم من يدخل الجنة خالداً مُخلداً فيها ، خلود لا ينتهي ، مش إحنا عارفين كده ، و منهم اللي هيفنى ، على حسب مشيئة ربنا سبحانه و تعالى ، لكن ربنا عبر عن المصير بالمآب ، أي الرجوع ، الأوبة ، كأننا من ذلك العالم ، من عالم السماء .

{كَذَلِكَ أَرْسَلْنَاكَ فِي أُمَّةٍ قَدْ خَلَتْ مِنْ قَبْلِهَا أُمَمٌ لِّتَتْلُوَ عَلَيْهِمُ الَّذِي أَوْحَيْنَا إِلَيْكَ وَهُمْ يَكْفُرُونَ بِالرَّحْمَنِ قُلْ هُوَ رَبِّي لَا إِلَهَ إِلَّا هُوَ عَلَيْهِ تَوَكَّلْتُ وَإِلَيْهِ مَتَابُ} :

(كذلك أرسلناك في أمة قد خلت من قبلها أمم) ربنا هنا بيصف حال الرسول ، رسول الإسلام محمد ﷺ ، (كذلك أرسلناك في أمة) أمة إيه؟ هم أهل مكة و أهل الكتاب اللي كانوا موجودين وقتها ، في المنطقة دي ، (كذلك أرسلناك في أمة قد خلت من قبلها أمم) في أمم قبلها خلت و انتهت و قابلت مصيرها ، (قد خلت من قبلها أمم) إيه؟ (لتتلو عليهم الذي أوحينا إليك) وظيفتك إيه ، تتلو ، تتلو ، تقرأ عليهم الوحي اللي إحنا نعطيه لك و الحكمة اللي بيديها لك/نعطيها لك و بالتالي تزكيهم ، لمن طلب التزكية و أتى إليك خاشعاً خاضعاً متواضعاً ، (كذلك أرسلناك في أمة قد خلت من قبلها أمم لتتلو عليهم الذي أوحينا إليك و هم يكفرون بالرحمن) يكفرون بصفة الرحمن ، اللي هو إيه؟؟ الرحيم بكل عباده ، يعني رحمن يفيض صفة الرحمة على كل المخلوقات ، سواء أكانت مؤمنة أم كافرة ، فهذا إيه ، وصف عظيم جداً لله ، إن هو رحمن أي أن رحماته تنزل على كل الموجودات ، الرسول نبي الرحمة ، لذلك سُمي نبي الرحمة ، أرسل لكي يُعرفنا على هذا الإله ، الرحمن ، طبعاً إحنا عارفين إن (الرحيم) إله الرحمات برضو بس للمؤمنين بس ، الرحيم هو فيض للمؤمنين فقط كما قال الإمام المهدي ﷺ ، لكن الرحمن هو فيض رحمة لكل الموجودات ، مش إحنا عارفين كده؟ طيب ، (و هم يكفرون بالرحمن) مين اللي بيكفروا بالرحمن؟ أهل مكة الوثنيين و كذلك وقتها أهل الكتاب معترفوش مين الرحمن ، معترفوش الرحمة ، لأنهم مثاليين كفرة مشركين ، كذلك اليهود حرفوا صفات الله عز و جل و حرفوا في تعاليم الأنبياء ، فمنعوا الرحمة عن أهلهم و عن أقوامهم و عن شعوبهم ، اللي يُحرف كلام الله ، يمنع الرحمة من الله عنهم بما كسبت أيديهم طبعاً ، (قل هو ربي لا إله إلا هو عليه توكلت و إليه متاب) عَرَفْهم هنا ، رينا بيقول له : يا محمد عَرَفْهم بي ، عرفهم بالإله الحق ، الرحمن ده ، (قل هو ربي) ربي ، (لا إله إلا هو) توحيد هنا بقى ، لا إله إلا هو ، كلمة التوحيد ، (عليه توكلت) يعني كل شيء عندي و كَلْتَه الله ، يعني أسلمته لله ، سَلَمْتُ نفسي لله ، سَلَمْتُ حالي لله ، سَلَمْتُ مصيري و مآلي و مالي لله و بالتالي أنا تائب ، (و إليه متاب) زي ما هو إليه مآب هو أيضاً إليه متاب ، (متاب) يكون في الدنيا ، و (المآب) يكون في الآخرة ، صح كده؟ ، (عليه توكلت و إليه متاب) و مين أول التائبين؟؟ الرسول محمد ﷺ ، و مين أول التائبين في كل زمان؟؟ نبي الزمان ، أي نبي زمان هو أول التائبين ، و صفة التوبة و التائب ، إسم فاعل ، أول صفة بيتصف بها نبي الزمان ، إنه تائب ، يتوب لله عز و جل ، و ثم يتوب من تَبَعَه ، ثم يتوب من تَبَعَهُ لله عز و جل ، تمام كده؟ .

{وَلَوْ أَنَّ قُرْآنًا سُيِّرَتْ بِهِ الْجِبَالُ أَوْ قُطِّعَتْ بِهِ الْأَرْضُ أَوْ كُلِّمَ بِهِ الْمَوْتَىٰ بَلْ لَّيْلَهُ الْأَمْرُ جَمِيعًا أَقَلَّمْ يَبَاسُ الَّذِينَ آمَنُوا أَنْ لَوْ يَشَاءُ اللَّهُ لَهْدَى النَّاسَ جَمِيعًا وَلَا يَزَالُ الَّذِينَ كَفَرُوا تُصِيبُهُمْ بِمَا صَنَعُوا قَارِعَةٌ أَوْ تَحُلُّ قَرِيبًا مِّن دَارِهِمْ حَتَّىٰ يَأْتِيَ وَعْدُ اللَّهِ إِنَّ اللَّهَ لَا يُخْلِفُ الْمِيعَادُ} :

(و لو أن قرأناً سيرت به الجبال أو قطعت به الأرض أو كلم به الموتى بل لله الأمر جميعاً أفلم ييأس الذين آمنوا أن لو يشاء الله لهدى الناس جميعاً و لا يزال الذين كفروا تصيبهم بما صنعوا قارعة) الآية دي و إكمالها تصف نفسية مين؟ الكفار و المؤمنين ، يعني ربنا بيوصف لنا نفسية الكافر في بداية الآية و نفسية المؤمن ، يعني رغبات الكافر و رغبات المؤمن ، إزاي بقى؟؟ ربنا بيقولك إن الكافر ده دايمياً بيميل للآيات المادية و بيحب يبقى يشوف فقرات ترفيحية ، يعني آيات مادية ، ليه؟ لأن هم فهمهم سقيم ، بيقيسوا كل حاجة بالمادة ، بالقيمة الفيزيائية ، ميفهموش يعني إيه روح و روحانيات و نفس مرضية ، معرفوش النفس المرضية ، فربنا بيوصف حالهم هنا و جدالهم و نفسيتهم و بيقول إيه ، كأن الكفار بيقولوا إيه : (و لو أن قرأناً سيرت به الجبال) يعني يا ريت القرآن اللي جاي به يا محمد بتسير به الجبال ، بتنقل به جبل من مكان لمكان ، (أو قطعت به الأرض) تخلينا/تجعلنا نطير من مكان لمكان على بساط الريح ، بسرعة يعني ، (أو كلم به الموتى) بتخلينا نكلم الأموات ، زي كده السحرة لما بيحبوا كده بلورة و بيقولوا لك إيه : هنكلم الروح الفلانية أو الميت الفلاني هجيبهولك ، طبعاً شوية دجالين ، طبعاً ده دجل ، و شغل سحرة مجرمين ، بس هم بيفكروا كده الكفار : القرآن بتاعك ده هنستفيد منه إيه؟؟ عارف يا محمد لو كان القرآن بينقل الجبل من مكان لمكان أو بيخلينا نسافر بسرعة من مكان لمكان ، مثلاً نسافر من مكة لفلسطين في ثانية ، أو نكلم به آباءنا اللي ماتوا ، كان بقى ، كان له فائدة ، كنا هننظر له بعين الإحترام ، الكفرة بيقولوا كده ، يبقى ربنا هنا بيعبر عن الكفرة ، نفسيتهم إيه إتجاه القرآن ، (و لو أم قرأناً سيرت به الجبال أو قطعت به الأرض أو كلم به الموتى) ربنا بيرد عليهم هنا و بيقول لهم إيه : (بل لله الأمر جميعاً) يعني ربنا مسيطر على كل حاجة ، ربنا مسيطر على كل حاجة ، كل شيء ، (أفلم ييأس الذين آمنوا) هنا بقى بيوصف وجدان المؤمنين إنهم نفسهم العالم كله يبقى مؤمن زيهم و بيوصلوا لمرحلة اليأس إنهم يهدوا/يقومون بهداية الناس جميعاً لله ، يهدوا قلوبهم طبعاً يعني ، مهادت الطريق لكل أحد ، الأنبياء و المؤمنين بيهدوا هداية الطريق ، لكن هداية القلب دي بإيد مين؟ بيد الله وفق إيه؟ وفق تصرف الكافر لو آمن أو إختار الإيمان ، لأن الإنسان مخير و بإختياره يكون فيما يليه مسير ، مش إحنا عارفين كده؟ ، يبقى ربنا بيوصف حال المؤمنين بقى (أفلم ييأس الذين آمنوا أن لو يشاء الله لهدى الناس جميعاً) يعني ما أجي كده و أقول لكم عن نفسية المؤمنين ، اللي هي إيه؟ بيوصلوا مرحلة يأس من إن الناس كلها تؤمن ، طبعاً الناس عمرها ما تؤمن كلها ، لأن ربنا ذمّ الكثرة في القرآن و قال إن أكثر الناس ليسوا بمؤمنين ، (أفلم ييأس الذين آمنوا) يعني ماشوفتش المؤمنين اللي هم يؤمنوا من الكفار إنهم يؤمنوا ، (أفلم ييأس الذين آمنوا أن لو يشاء الله لهدى الناس جميعاً) ، (و لا يزال الذين كفروا تصيبهم بما صنعوا قارعة أو تحل قريباً من دارهم) بشؤم معصيتهم و بشؤم كفرهم ، إذا الذنب و المعصية له شؤم و نحس يحل على الكفار و العصاة ، عليهم أو قريب منهم ، و القارعة اللي هي إيه : الإرتياع القوي ، قارعة : قاف قوة ، رعة أي إرتياع ، خوف ، خوف قوي ، هي دي القارعة ، (أو تحل قريباً من دارهم) تحيط بأقاربهم يعني ، هم أو أقاربهم ، (حتى يأتي وعد الله) يعني كده كده شؤم المعصية ده نازل عليهم لغاية ما ييجي وعد ربنا بالساعة الكبرى أو الساعة الصغرى أو بساعة كل قوم ، نهاية كل قوم ، لأن نهاية القوم تسمى ساعة ، و ساعة قریش كانت كم؟؟ عام ٨ هجرية ، فتح مكة ، هي دي كانت ساعة قریش ، عارفين كده طبعاً؟ ، (إن الله لا يخلف الميعاد) ربنا مواعيده ثابتة ، قدرية مبرمة ، في مواعيد كده ، ساعات ، ربنا

حاططها في الكون ، ساعات اللي هي شمعات فيصلة على الطريق معنونة ، ساعات مؤقتة ، مؤقتة بزمان معين و محدد ، ربنا بيقول إيه (إنما نعد لهم عدداً) ربنا بيعد ، بيعد مقدار معين ، ثابت عنده ، هو أعلم به ، ساعتها بقى بعد ما ينتهي العدد ، يفور التنور ، تبدأ ساعة الصفر ، مش إحنا قلنا الكلام ده قبل كده .

{وَلَقَدْ اسْتَهْزَأَ بِرُسُلٍ مِّن قَبْلِكَ فَأَمَلَيْتُ لِلَّذِينَ كَفَرُوا ثُمَّ أَخَذْتُهُمْ فَكَيْفَ كَانَ عِقَابِ} :

بعد كده ربنا بيعزي النبي ﷺ و بياخذ بخاطره ، يجبر بخاطره ، (و لقد استهزئ برسل من قبلك فأمليت للذين كفروا ثم أخذتهم) يعني مش هم بس اللي بيستهزؤا بك ، لا ، قبل كده الأنبياء كلهم تم الإستهزاء بهم ، فماتزعلش ، ماتاخذش على خاطرك ، ربنا هنا يجبر بخاطر النبي ، (و لقد استهزئ برسل من قبلك فأمليت للذين كفروا) يعني صبرت عليهم ، و أعطيتهم فرصة ، (أمليت) يعني أعطيتهم فرصة ، و كذلك (أمليت) ملأت لهم العد بتاعهم ، ملأتلهم الميزان بتاعهم بالذنوب ، بذنوبهم طبعاً ، فأمليت لهم يعني أعطيتهم مهلة للتوبة ، كذلك أمليت لهم أي جمعت كل معاصيهم و كفرهم و عدبتهم/قمت بعهده ، إيه؟ ، (فأمليت الذين كفروا ثم أخذتهم فكيف كان عقاب) إيه رأيك في عقابي؟؟ اللي إنتو شوفتوه على الكفار في الدنيا في الأمم السابقة ، طبعاً و هذا يستلزم قراءة التاريخ لاننا مامورون بقراءة التاريخ قراءة صحيحة لآخذ العظة و العبرة ، (فكيف كان عقاب) و السؤال هنا في إشارات إيه ، خووف ، يعني بعث للخوف في قلوب المستمعين ، (فكيف كان عقاب) إيه رأيك في العقاب اللي انا عاقبتهم به في الدنيا؟؟ يعني خلي بالكم ، يعني إلزموا و اتقوا الله و ارجعوا إليه ، و أطيعوا الله و الرسول و أولي الأمر منكم يعني أصحاب العلم الإلهي ، أصحاب العرفان الإلهي اللي هم الأولياء و الأتقياء و أصحاب مقام النبوة ، هم هؤلاء أولي الأمر ، مش الحُكام ، هذا هو التفسير الصحيح .

{أَفَمَن هُوَ قَائِمٌ عَلَى كُلِّ نَفْسٍ بِمَا كَسَبَتْ وَجَعَلُوا لِلَّهِ شُرَكَاءَ قُلْ سَمُّوهُمْ أَمْ تُنَبِّئُونَهُ بِمَا لَا يَعْلَمُ فِي الْأَرْضِ أَمْ بَظَاهِرٍ مِّنَ الْقَوْلِ بَلْ زَيْنَ الَّذِينَ كَفَرُوا مَكْرَهُمْ وَصُدُّوا عَنِ السَّبِيلِ وَمَن يُضِلِلِ اللَّهُ فَمَا لَهُ مِن هَادٍ} :

(أفمن هو قائم على كل نفس بما كسبت) ربنا بيصف نفسه هنا ، بيقول : أنا قائم على كل نفس بما كسبت ، يعني أنا عارف كل نفس بتعمل إيه و مابتعملش إيه ، عارف خفايا النفس ، عارف كل ورقة من أي شجرة سقطت إمتى و سقطت فين ، ربنا عليم حكيم دقيق ، (بما كسبت) اللي هي عملت ، فعلت يعني ، أو وضعت في ميزانها إما بشر أو بخير ، (و جعلوا لله شركاء قل سموهم) يعني ربنا هو أعلم بهم و مع ذلك يتخذوا شركاء معه ، يتخذوا شركاء معه ، مع الله عز و جل ، ربنا هنا بقى بيقول للكفار إيه (قل سموهم) يعني انطقوا أسماءهم لو تقدرُوا يوم القيامة ، انطقوا أسماءهم لو تقدرُوا يوم القيامة ، (قل سموهم أم تنبئونه بما لا يعلم في الأرض أم بظاهر من

(القول) يعني إنتو هتقولوا لربنا الحاجات اللي مش عارفها يعني في الأرض ، (أم بظاهر من القول) يعني هتكذبوا على ربنا ، إنتو تجرؤا إن إنتو تقولوا إن ربنا مايعرفش حاجة أو في حاجات مايعرفهاش؟؟ ربنا بيستنكر ، بيسأل سؤال استنكاري ، (أم تنبؤونه بما لا يعلم في الأرض أم بظاهر من القول) يعني بتقولوا حاجات ظاهرة تكذبوا عليه و على أساس إن هو مايعرفش خفاياكم و خباياكم و بواطنكم ، ده المعنى ، ببيگت الكفار في الدنيا و الآخرة ، (أم تنبؤونه) تنبؤون الله عز و جل (بما لا يعلم في الأرض أم بظاهر من القول) ، (بل زين للذين كفروا مكرهم) زين للذين كفروا مكرهم في الدنيا ، الشيطان هو الذي زين لهم هذا المكر ، (و صدوا عن السبيل) دي قراءة صحيحة ، و كذلك (و صدوا عن السبيل) أيضاً قراءة صحيحة ، صدوا أي صدوا المؤمنين ، حاولوا يصدوا المؤمنين أو يصدوا الناس عن الإيمان ، و كذلك (و صدوا عن السبيل) أي بما كسبت أيديهم و بما كسبت ألسنتهم و نفوسهم و قلوبهم ، فتم الصد عن سبيل الله بهذه الأفعال ، بشؤم تلك المعاصي ، (و من يضل الله فماله من هاد) اللي ربنا بيضله نتيجة إختياره طبعاً (فماله من هاد) مش هتقدر تهديه يا مؤمن أو يا نبي فبتالي إيه ، ماتياسش ، ماتحسش باليأس (أفلم ييأس الذين آمنوا أن لو يشاء الله لهدى الناس جميعاً) فهنا ده عزاء و تسلية للمؤمنين و الأنبياء ، ماتزعلش ، مصير الكفار نتيجة إختيارهم هم ، هم اخذوا فرصتهم و ربنا لا يظلم أحداً (و ما ربك بظلام للعبيد) (و لا يظلم ربك أحداً) تمام كده ، دي قاعدة معروفة .

{لَهُمْ عَذَابٌ فِي الْحَيَاةِ الدُّنْيَا وَلَعَذَابُ الْآخِرَةِ أَشَقُّ وَمَا لَهُمْ مِّنَ اللَّهِ مِن وَّاقٍ} :

(لهم عذاب في الحياة الدنيا و لعذاب الآخرة أشق) الكفار بيتعذبوا بأعمالهم في الدنيا ، دايماً كده ، بتلاقيهم في عذاب أليم في الدنيا ، عذاب نفسي أليم ، (و لعذاب الآخرة أشق) عذاب الآخرة أشد ، أشق يعني أكثر مشقة ، أكثر مشقة و عذاباً ، (و ما لهم من الله من واق) محدش يقدر يمنع عذابهم من الله ، يعني محدش يقدر يوقف أمام ربنا و يتحداه فيمنع العذاب عن الكفار ، أبداً ، محدش يقدر يقبضهم من الله عز و جل ، فلذلك يجب إن إحنا نتحلى بإيه؟؟ بالتقوى ، أي نجعل بيننا و بين عذاب الله وقاية ، صح؟ يبقى إيه هو اللي بيقينا من عذاب الله؟؟ التقوى ، هي دي الحاجة الوحيدة اللي تعملك وقاية من عذاب الله ، طبعاً بالإضافة لرحمة الله عز و جل ، و إستدرار رحمته سبحانه و تعالى .

• و أثناء تصحيح نبي الله الحبيب يوسف الثاني ﷺ لتلاوتنا ، قال لنا :

- كمان (أفلم ييأس الذين آمنوا) في قراءة أخرى معناها أو صحيحة : (أفلم يتبَّين الذين آمنوا أن لو يشاء الله لهدى الناس جميعاً) ، كذلك (أفلم ييأس) كذلك (أفلم يتبين) دي قراءة صحيحة أخرى .

- كذلك لما نقول إن كفار قريش الوثنيين ميعرفوش الرحمن ، دي عارفينها لأنهم كفار أصلاً وثنيين ، طيب ، اليهود و النصارى مايعرفوش الرحمن إزاي؟؟ لأن

النصارى المجرمين يقولوا إيه؟ إن الإنسان بيرث الخطيئة ، حتى لو هو مولود طفل كده صغنن ، هو يبقى عليه خطيئة برضو ، يبقى حد يقول كده؟!!! ده ظلم ، ظلم الله عز و جل ، و إتهام الله بالظلم ، هيحمل طفل صغير مولود خطيئة!!! هاه!! يبقى هو إيه مُخطئ من صُغره الطفل ده ، يبقى ربنا عندهم مش رحمن و لا حاجة ، مابيرحمش حد ، كذلك اليهود يقولوا : إحنا شعب الله المختار و كل الشعوب التانية دي ماتستحقش رحمة ربنا ، فعقيدتهم كده ، فهولاء مايعرفوش الرحمن ، إذا هم هولاء مايعرفوش الرحمن من خلال التحريف في صفات الله عز و جل و إتهام الله بالكذب و إتهام الله إتهامات كاذبة ، إن هو إيه؟؟ غير رحيم ، و كذلك الوثنيين كفار قريش مايعرفوش الرحمن ، لأن هم أصلاً وثنيين ، لم يعرفوا التوحيد ، فهمتوا يعني إيه بقى إن دول/هولاء مايعرفوش الرحمن سواء أكانوا وثنيين أو أهل الكتاب ، لأن النبي أرسل لهم جميعاً ، أرسل للوثنيين و أرسل لأهل الكتاب ، صح كده؟؟ لأن الشعوب ساعتها أو المنطقة ساعتها كانت منطقة مختلطة ما بينهما الإثنين ، رينا أرسله للإثنين ، و بالتالي العالم كله .

و اختتم نبي الله الجلسة المباركة بقوله المبارك :

هذا و صلّ اللهم و سلم على نبينا محمد و على آله و صحبه و سلم ، سبحانك اللهم و بحمدك ، أشهد أن لا إله إلا أنت ، أستغفرك و أتوب إليك .

و الحمد لله رب العالمين . و صلّ يا ربي و سلم على أنبياءك الكرام محمد و أحمد و يوسف بن المسيح صلوات تلو صلوات طيبات مباركات ، و على أنبياء عهد محمد الآتين في مستقبل قرون السنين أجمعين . آمين .  

درس القرآن و تفسير الوجه الأخير من الرعد .

أسماء إبراهيم :

شرح لنا سيدي و حبيبي يوسف بن المسيح ﷺ أثناء جلسة التلاوة المباركة من أحكام التلاوة ؛ من أحكام النون الساكنة و التنوين , ثم قام بقراءة الوجه السادس و الأخير من أوجه سورة الرعد ، و أجاب على أسئلتنا بهذا الوجه ، و أنهى نبي الله الحبيب الجلسة بأن صحح لنا تلاوتنا .

بدأ نبي الله جلسة التلاوة المباركة بقوله :

الحمد لله ، الحمد لله وحده ، الحمد لله وحده و الصلاة و السلام على محمد و من تبعه من أنبياء عهده و بعد ، لدينا اليوم الوجه السادس و الأخير من أوجه سورة الرعد ، و نبدأ بأحكام التلاوة و أحمد :

من أحكام النون الساكنة و التنوين :

الإدغام و حروفه مجموعة في كلمة (يرملون) أي أنه إذا أتى بعد النون الساكنة أو التنوين حرف من حروفها , و هو نوعان : إدغام بغنة و حروفه مجموعة في كلمة (ينمو) . و إدغام بغير غنة و حروفه (ل ، ر) .

و الإخفاء الحقيقي حروفه في أوائل الكلمات من الجملة الآتية (صف ذا ثنا كم جاد شخص قد سما دُم طيباً زد في تقي ضع ظالماً) .

و بعد أحمد قال الأحكام مروان ثم رفيدة ثم أرسلان .

○ و ثم طلب سيدي يوسف بن المسيح ﷺ من أحمد قراءة سورة قریش ، و صحح له قراءته .

و ثم تابع نبي الله يوسف الثاني ﷺ الجلسة بشرح الوجه لنا فقال :

{مَثَلُ الْجَنَّةِ الَّتِي وُعدَ الْمُتَّقُونَ تَجْرِي مِنْ تَحْتِهَا الْأَنْهَارُ أُكُلُهَا دَائِمٌ وَظُلُّهَا تِلْكَ عُقْبَى الَّذِينَ اتَّقَوْا وَعُقْبَى الْكَافِرِينَ النَّارُ} :

(مثل الجنة التي وعد المتقون) ربنا هنا بيصف الجنة ، بيحفز المؤمنين و بيحفز الطالبين للجنة ، بيحفزهم للعمل عشان يحصلوا عليها ، و أول العمل هو الإيمان ، الإعتقاد ، أول العمل : الإعتقاد ، (مثل الجنة التي وعد المتقون) المتقون الذين جعلوا بينهم و بين عذاب الله وقاية ، عاملة إزاي ، تقريباً ، هنا تمثيل ، تقريب للصورة ، تقريب للصورة عشان أذهاننا البسيطة تحاول تفهمها فتتحفز لها لكي تطلبها فتسكنها ، (تجري من تحتها الأنهار) أنهار كثيرة جداً بتجري في أرض هذه الجنة ، (تجري من تحتها الأنهار) يعني في الباكجراوند background أو الأرض بتاعت الجنة دي ، أنهار كثيرة جداً بتجري فيها ، في كل الإتجاهات ، و إيه تاني؟ (أكلها) يعني ثمار الجنة دي و النعيم اللي بيؤكل فيها ، كان بقى من ثمار نباتي أو فواكه أو لحوم أو أي متعة أخرى تؤكل ، (أكلها دائماً) دائم يعني مايجيش مثلاً وقت كده و نلاقي في عجز أو نقص ، و نقول مثلاً استنوا أسبوع عبال ما تتوفر ، لا ، طول ما هم قاعدين في الجنة ، سواء كان الجلوس هنا دائماً أو مؤقت الأكل دائماً ، و إيه تاني؟ الظل ، ظل الأشجار ، ظل الثمار و الأشجار دائماً ، يعني مفيش عندهم خريف ، الجنة مفيهاش خريف ، الجنة ربيع ، الجنة على طول ربيع ، فبالتالي الأوراق دايماً يانعة ، خضراء ، و الثمار نضرة ، ناضجة ، و الزهور مزهرة و الورود متفتحة ، دائماً كده ، ربيع في ربيع ، (تلك عقبى الذين اتقوا) عقبى اللي هو إيه؟ العاقبة ، المصير ، النهاية ، المصير اللي هو إيه؟ حقيقة الشيء ، حقيقة الأمر إحنا قلناها قبل كده إيه؟ اللي هو إيه؟ الخاتمة أو المصير ، فعقبى الذين اتقوا هي الجنة الجميلة دي ، حقيقة مآلهم ، طيب ، عقبى الكافرين إيه بقى؟ اللي هم آذوا الأنبياء و كفروا بهم؟ النار ، ليه بقى؟ لأن الواحد لما يشوف في الدنيا دي ناس ، بيشفوف ناس لينة العريكة يعني ناس طيبة ، و بيشفوف ناس إيه؟ يعني مرة كده و مرة كده ، و بيشفوف ناس لا ، ماينفعش معهم إلا النار ، هي كده ، لا يستحقون إلا النار ، لأنهم خبثاء ، خبثاء الظاهر و الطوية ، ماينفعش ، ماينفعش يتمهدوا و لا ينظفوا إلا بالنار ، شوفوا أد/قد إيه هم خبثاء؟؟ عشان كده ربنا عمل النار ، فربنا عمل النار إيه؟ حاجة الكفار لها ، الكفار يحتاجون النار ، لكي يتطهروا و يبقوا إيه؟ سهلين كده و لينين و طيبين ، حقيقي!

{وَالَّذِينَ اتَّيْنَاهُمُ الْكِتَابَ يَفْرَحُونَ بِمَا أُنْزِلَ إِلَيْكَ وَمِنَ الْأَحْزَابِ مَنْ يُنْكِرُ بَعْضَهُ قُلْ إِنَّمَا أُمِرْتُ أَنْ أَعْبُدَ اللَّهَ وَلَا أُشْرِكَ بِهِ إِلَيْهِ أَدْعُو وَإِلَيْهِ مَآبٌ} :

(و الذين أتيناهم الكتاب يفرحون بما أنزل إليك) يا سلام ، سيدنا محمد ﷺ كان من الطائفة الموحدة ، زي ما إحنا كده ، إحنا مسلمين أحمديين ، إحنا الطائفة الموحدة اللي تعرف الإسلام على حق ، بقايا الإيمان الحقيقي موجودة في الأحمدية و بالأخص

في اليوسفيين ، المسيح الموعود ﷺ ربنا بعثه مصداق إيه؟ لنبوءات النبي ﷺ ، النبي بتاعنا بقى ، الرسول ﷺ كان من الطائفة الموحدة الإبيونية ، اللي كان منها خديجة و ورقة بن نوفل و آخرين ، (و الذين أتيناهم الكتاب) يعني إيه؟ الرسالة ، قبل إيه؟ سيدنا محمد ﷺ ، اللي هم مين؟ في الشرق الأوسط ، اللي هم المنطقة بتاعتنا ، تمام؟ اللي هم بني إسرائيل ، (يفرحون بما أنزل إليك) مبسوطين إن إنت أنزل إليك الناموس اللي وعد يأتي مثيل موسى ، كما قال له ورقة بن نوفل ، مش كده في نبوءة في التوراة عن النبي ﷺ ((أخرج لهم من بين إخوتهم مثيل لك ، و أجعل كلامي في فمه)) صح كده؟ آه ، سيدنا محمد ﷺ ، هو اللي انطبقت عليه النبوءة ، (و من الأحزاب) طبعاً بني إسرائيل كانوا طوائف كثيرة ، طوائف كثيرة ، زي ما المسلمين دلوقتي طوائف كثيرة ، (و من الأحزاب من ينكر بعضه) في طوائف بينكروا الكلام اللي إنت بتقوله عن وحدانية الله ، و إن عيسى نبي ، و إن إنت يا محمد جاي/أتيت بالشرعية الأخيرة ، في ناس بتنكر الكلام ده ، و في ناس موافكك اللي هم فرحوا ، اللي هم الموحدين ، بقايا الموحدين ، (قل إنما أمرت أن أعبد الله و لا أشرك به) أول حاجة تقولها لهم : التوحيد ، أعبد ربنا الواحد ، و لا أشرك به شيئاً ، زي الصراط المستقيم كده ، سيف ، النبي إيه؟ سيف ، أي نبي هو إيه؟ سيف ، سواء بقى السيف ده كان مادي أو معنوي ، أو معنوي بس ، بس كل نبي لازم يكون سيف معنوي الأول ، سيف ، كلمة حق ، النبي هو عبارة عن كلمة حق ، كلمة حق ، ليه؟ لأن النبي ده هو خارج من فم الله ، هو كلمة خرجت من فم الله ، و الله هو إيه؟ الحق ؛ إسم من أسماء الله ، إذا النبي هو كلمة حق ، و كلمة الحق بتبقى إيه؟ سيف ، صح كده؟ إنتو عارفين إن راية المسيح الموعود ﷺ عليها سيف ، و عليها كلمة التوحيد ، و عليها منارة المسيح الموعود ﷺ ، (قل إنما أمرت أن أعبد الله و لا أشرك به) آه بعد كده إيه ، لما أمر بالتوحيد ، أعمل إيه بقى ، و أنهى عن الشرك ، الأمر بالتوحيد و أنهى عن الشرك ، أعمل إيه؟؟ (إليه أَدْعُو و إليه مَأْب) أَدْعُو إلی ربنا يعني أَعْرِف الناس بوجه الله ، أحاول أكمل وجهه عندهم ، زي ما كده القمر وجهه بيكتمل ، أحاول أكمل الصورة الحقيقة عن صفات الله عز و جل عند الناس ، (إليه أَدْعُو و إليه مَأْب) أنا بعمل إيه؟ بدعو إلی الله عز و جل عشان صورته تكتمل عند الناس ، يعني الناس تتعرف عليه ، هي دي وظيفة الأنبياء ، إن الناس تتعرف على مين؟ على الله ، تتعرف على الله عز و جل ، تتعرف عليه ، و بعدين ، المحفز لي إيه؟؟ (و إليه مَأْب) أنا كده كده راجعله ، فعلشان إيه ، ما أبقاش مكسوف قدامه ، فلازم أجهد و أعمل بجهد لكي أَعْرِف الناس على الله ، (و إليه مَأْب) يبقى أنا كده إيه؟ رايحله رايحله ، أهو (قل إنما أمرت أن أعبد الله و لا أشرك به إليه أَدْعُو) و بعدين بقى الحافز العظيم اللي بيحركني (و إليه مَأْب) أنا كده كده راجعله ، صح؟ .

{وَكَذَلِكَ أَنْزَلْنَاهُ حُكْمًا عَرَبِيًّا وَلَئِنْ اتَّبَعْتَ أَهْوَاءَهُمْ بَعْدَ مَا جَاءَكَ مِنَ الْعِلْمِ مَا لَكَ مِنَ اللَّهِ مِنْ وَلِيٍّ وَلَا وَاقٍ} :

(و كذلك أنزلناه حكماً عربياً) القرآن ده حُكم ، مهمين ، (عربياً) مُعرب ، لغة العرب ، باللغة الإلهامية ، ربنا جعل اللغة العربية لغة إلهامية ، و أي كلمة في أي لغة تانية ، رينا عربها في القرآن أو نطقها ، جعل نطقها عربي بشكل معين ، يبقى ربنا أفاض

على الكلمة دي من صفات اللغة العربية و من إلهام معاني أصوات اللغة العربية ، حتى و لو كانت أصل الكلمة مش عربي ، سرياني مثلاً ، عبري ، المهم ما دامت تعربت يبقى أخذت من فيوض اللغة العربية ، يعني أخذت من معاني أصوات الحروف العربية ، ربنا حط فيها معاني بطريقة أو بأخرى ، إنت تكتشفها لما تتأمل القرآن الكريم ، (و كذلك أنزلناه حكماً عربياً) المهيمين مين؟ القرآن ، حكم ، حكم ، مهيمين ، (و لئن اتبعت أهواءهم بعد ما جاءك من العلم مالك من الله من ولي و لا واق) يبقى العلم الحقيقي و الوحي الحقيقي و الحكم الحقيقي و الهيمنة الحقيقية و الفصل الحقيقي هو إيه؟؟ القرآن الكريم ، و بعد كده ربنا بيحذر النبي و كل نبي (و لئن اتبعت أهواءهم بعد ما جاءك من العلم) الأهواء بقى إيه؟ الضلالات و البدعات المخالفة للتوحيد ، لو إنت ملت إلى أهواءهم بعد ما جاءك من العلم الحقيقي ده ، آاه (مالك من الله من ولي و لا واق) ربنا هيرفع نصرته عنك ، و مش هيجيلك من الله إيه؟ (ولي) يعني نصير (و لا واق) و لا حامي ، يعني مش هيجيلك من الله ناصر ، ملائكة تنصرك أو ملائكة تحميك ، تقيك ، خلاص؟ يعني ربنا هيرفع حمايته عنك و نصرته لو اتبعت أهواء المشركين ، و المشركين هؤلاء في كل مكان و زمان و في كل إيه؟ و في كل الأديان .

{وَلَقَدْ أَرْسَلْنَا رُسُلًا مِّن قَبْلِكَ وَجَعَلْنَا لَهُمْ أَزْوَاجًا وَذُرِّيَّةً وَمَا كَانَ لِرَسُولٍ أَنْ يَأْتِيَ بِآيَةٍ إِلَّا بِإِذْنِ اللَّهِ لِكُلِّ أَجَلٍ كِتَابٌ} :

(و لقد أرسلنا رسلاً من قبلك و جعلنا لهم أزواجاً و ذرية) ربنا بيقول إن البعث ده أمر طبيعي يحدث في هذا الكون ، ليه بقى؟ لأن ربنا عنده أم الكتاب ، يعني إيه؟ سنة البعث دي سنة جارية إلى قيام الساعة ، ليه؟ لأن ربنا عنده أم الكتاب ، يعني إيه؟ (أم الكتاب) أم يعني مهد و أصل ، الكتاب يعني الرسالة ، أصل الرسالة عند الله ، فاللي عنده أصل الرسالة لازم بيعت رسالة كل زمان ، صح؟ هو ده المعنى الحقيقي لأم الكتاب ، اللي هو أصل البعث ، مهد البعث ، تمام كده؟ ، (و لقد أرسلنا رسلاً من قبلك و جعلنا لهم أزواجاً و ذرية) يعني الرسل هؤلاء بشر ، بيتزوجوا و ينجبوا ، صح كده؟ ، (و ما كان لرسول أن يأتي بآية إلا بإذن الله) الكفار اللي بيطلبوا آيات مادية ، ما يستعجلوش ، و يجب أن يتأدبوا مع الأنبياء ، ليه؟ لأن الآية المادية بيد الله عز و جل ، يُعطيهام متى شاء و لمن شاء ، (لكل أجل كتاب) يعني لكل آية معاد/ميعاد ، و لكل نهاية معاد ، يعني إيه؟ وقت محدد ، (لكل أجل كتاب) كذلك لكل زمان رسالة ، (لكل أجل) أي لكل زمان ، (كتاب) أي رسالة ، يعني ده دليل أن البعث مستمر ، (لكل أجل كتاب) زي ما إحنا بنقول كده بالعامية : ((كل عصر و له أدانه)) ، هنا ربنا بيقوله (لكل أجل كتاب) كل زمن له الرسالة بتاعته ، له رسالة ، له بعث ، دي حقيقة مفروغ منها ، ربنا بياكد عليها دائماً في القرآن ، إزاي إحنا إيه أو المسلمين لم يلتفتوا إلى هذه المعاني و يفهموها ، مين اللي فهمنا؟؟ المسيح الموعود ﷺ ، هو اللي فهمنا خبايا القرآن ، لأنه هو ليس بيننا و بينه حجاب ، يعني كتبه واضحة و كتبه يقينية ، ليس فيها شك ، فبالتالي ليس بيننا و بينه حجاب ، لكن الأحاديث النبوية عن الرسول ﷺ؟؟ لا ، بيننا و بينها حُجب كثيرة ؛ حُجب التاريخ ، حُجب الكذابين ، حُجب الأهواء ، حُجب الوضع و هكذا ، فبالتالي مين اللي نصر الإسلام و نصر القرآن؟؟

المسيح الموعود ﷺ و ده بنص نبوءات النبي ﷺ ، يبقى المسيح الموعود ﷺ ده صمام أو صمام الأمان للأجيال و للمجتمعات ، صمام الأمان ، تبقى مستريح كده و مطمئن ، أي حاجة ترجع لكتب المسيح الموعود ﷺ و قواعده في تفسير القرآن ، تفهم ، تبقى مطمئن/مطمئن كده و مطمئن على نفسك و على ذريتك و على مجتمعك و على المؤمنين ، عارف إنهم لن يضلوا طالما تمسكوا بكتاب الله و دعوة المسيح الموعود ﷺ اللي هي أصل دعوة الرسول ﷺ ، دعوة المسيح الموعود ﷺ هي أصلاً إيه؟ هي دعوة الرسول ﷺ ، لذلك النبي ﷺ قال لنا لازم نبايعه ، لازم نتمسك به ، لازم نبحت عنه ، و نحترمه و نُقدِّره و ندافع عنه ، صح؟ ، (لكل أجل كتاب) لكل زمان بعث و رسالة .

{يَمْحُو اللَّهُ مَا يَشَاءُ وَيُثَبِّتُ وَعِنْدَهُ أُمُّ الْكِتَابِ} :

(يمحو الله ما يشاء و يثبت) مبدأ إلهي ، على حسب إرادة ربنا و كذلك على حسب إرادة العباد ، إزاي؟ ربنا بيقدر الأقدار ، منها اللي يكون مُبرم ، و منها مايكونشي مُبرم ، كذلك الأقدار تتغير بالدعاء ، صح كده؟ ، الأقدار تتغير بالدعاء ، كذلك الأقدار بتتغير بفعل البشر ، لما بيختار إختيار هيكون مُسير في فعل بعد الإختيار ده ، فالقدر برضو بيتغير فيمحو الله ما يشاء و يثبت ، إذاً (يمحو الله ما يشاء و يثبت) على حسب إرادته سبحانه و تعالى و على حسب إرادة البشر برضو ، لأن الإنسان مُخَيَّر و بإختياره يكون فيما يليه مُسَيَّر في سلسلة من التخييرات و التسييرات ، صح؟ فبالتالي بناءً على المبدأ ده ، ربنا بيعَيِّر الأقدار من حين لآخر ، و من زمن لآخر ، و من وقت لآخر ، و من مكان لآخر ، كذلك إرادة ربنا سبحانه و تعالى و ما يرتئيه و ما يراه الصالح لعباده ، بُناءً عليه بيعَيِّر الأقدار المرسومة ، تمام ، (و عنده أم الكتاب) ربنا عنده أصل الرسالات ، و مهد الرسالات و مهد البعث ، (أم) يعني أصل ، مهد ، (الكتاب) الرسالة .

{وَإِنْ مَّا نُرِيَنَّكَ بَعْضَ الَّذِي نَعِدُهُمْ أَوْ نَتَوَفَّيَنَّكَ فَإِنَّمَا عَلَيْكَ الْبَلَاغُ وَ عَلَيْنَا الْحِسَابُ} :

يعني مايهمكش سواء الكفار اللي إنت شايفهم معاندين اتهمزمو أو لم ينهمزمو بعد ، مالكش دعوة ، إنت وظيفتك تبلغ ، تبليغ ، مصيرهم بقى ، ده بإيد ربنا سبحانه و تعالى في الدنيا و الآخرة ، يعني إنت بلغ ، ماتتظرش إن هم ينهمزمو أو ماتتظرش إنك ترى هزيمتهم ، إنت مُبلغ ، طبعاً الآية دي عشان يريح النبي ، يريح قلبه ، يريح النبي و يريح قلبه و يريح قلب كل نبي ، (و إن ما نرينك بعض الذي نعدهم أو نتوفينك) يعني بعض الهزائم اللي هم موعودين بها هتشوفها و بعضها لسي متأجل ، ممكن بعدين أو بعد وفاتك ، (فإنما عليك البلاغ) بَلِّغْ و بس ، (و علينا الحساب) إحنا اللي هنحاسبهم و هنوقع بهم العذاب في الدنيا و الآخرة ، و ده دليل من أدلة وجود

ربنا ، اللي هو إيه؟ الثواب و العقاب في الدنيا قبل الآخرة ، صح كده؟ مش إحنا قلنا ده الدليل الرابع على وجود الله .

{أَوَلَمْ يَرَوْا أَنَّا نَأْتِي الْأَرْضَ نَنْقُصُهَا مِنْ أَطْرَافِهَا وَاللَّهُ يَحْكُمُ لَا مُعَقِّبَ لِحُكْمِهِ وَهُوَ سَرِيعُ الْحِسَابِ} :

(أولم يروا أننا نأتي الأرض ننقصها من أطرافها) الآية دي لها معنيين ، معنى ظاهري و معنى مادي ، قصدي معنى باطني و معنى ظاهري ، المعنى الباطني اللي هو إيه : الكفار هؤلاء ماتعطوش من الأمم السابقة و عرفوا إن أرض الكفار دايمًا بتنقص من أطرافها ، دايمًا بيؤكلوا يوماً بعد يوم حتى ينتهوا ، ده المعنى ، و المعنى الظاهر بقى (أولم يروا أننا نأتي الأرض ننقصها من أطرافها) أي واحد واقف على مرفأ من المرافيء ، ميناء من الموانيء يعني ، و شايف السفن من بعيد ماشية ، سابت المرفأ و ماشية في الأفق ، مش بيشوف كده إن السفن دي بتهبط حتى تختفي ، تهبط لأسفل حتى تختفي ، (أولم يروا أننا نأتي الأرض ننقصها من أطرافها) ده مش دليل إن الأرض كروية ، صح؟ الأرض كروية ، أهو ربنا معطي هنا قرينة ، و ربنا قال عن الأرض دحاهها ، و الدحي هو التكوير ، البيضة في القرى مثلاً يقولوا عليها دحية ، دحية يعني إيه؟ مكورة زي البيضة كده ، الكرة الأرضية هي بيضاوية ، (أولم يروا أننا نأتي الأرض ننقصها من أطرافها) ده دليل على قدرة ربنا سبحانه و تعالى ، (و الله يحكم لا معقب لحكمه) ربنا هو الحكم ، (لا معقب لحكمه) يعني محدش يستأنف على الحكم بتاعه ، لأنه حُكم على بصيرة و على بينة و على خبايا النفوس ، القاضي في الدنيا مايشوفش الخبايا في النفوس ، مايعرفش الخبايا ، دي الظواهر بس ، و ممكن القاضي يتخدع ، ممكن القاضي يتخدع ، لكن ربنا قاضي القضاة ، أبداً لا يُخدع ، ليه؟ لأنه مُطلع على الخفايا ، شايف الخفايا ، شايف النيات ، شايف إيه الباطن ، إيه هو ، لذلك الدين دين باطني ، شايف الخفايا فمحدث يقدر يخدع ربنا ، فهو بيحكم ، لا معقب لحكمه ، حُكم نهائي ، مفيش إستئناف لأنه عارف ، عارف الخبايا ، محدش يقدر يهرب من ربنا و لا يضحك عليه ، (و هو سريع الحساب) وصف لربنا سبحانه و تعالى (سريع الحساب) ، حسابه سريع ، عدالة ناجزة .

{وَقَدْ مَكَرَ الَّذِينَ مِنْ قَبْلِهِمْ فَلِلَّهِ الْمَكْرُ جَمِيعًا يَعْلَمُ مَا تَكْسِبُ كُلُّ نَفْسٍ وَسَيَعْلَمُ الْكُفَّارُ لِمَنْ عَقَّبَى الدَّارِ} :

(و قد مكر الذين من قبلهم فله المكر جميعاً) كل قوم نبي مكروا بالنبي و كفروا به ، و قاموا بتشويه صورته و صدوا الناس عنه ، و بعد المكر ده؟ مانفعهمش بحاجة ، (فله المكر جميعاً) ، (فله المكر جميعاً) ربنا هنا بيفتخر ، إن هو إيه؟ يستطيع أن يُسيطر على الماكرين هؤلاء و يخدعهم و يمكر بهم ، و يُنزل بهم الهزائم المتتالية ، ليه؟ لأنهم كفار ماكرين خبيثي الطوية ، (فله المكر جميعاً) ربنا محيط ، كل مكرهم



دول ، كل مكر للكفار دول/هؤلاء ، ربنا محيط به (فله المكر جميعاً) يعني عنده علم المكر جميعاً ده ، كل المكر ده ، ربنا عارفه ، و عارف أصله إيه و فصله إيه ، و أوله إيه و نهايته إيه ، مسيطر مهيمن مُحيط ، (يعلم ما تكسب كل نفس) أهو كل نفس يعرف هي بتعمل إيه بالزبط في السر و في العلن ، مش محتاج بقى شهود ، مش محتاج أدلة ، مش محتاج قرائن ، صح؟ و مع ذلك ربنا بيخلي الأعضاء تشهد على الإنسان و تتكلم ، (و سيعلم الكفار لمن عقبى الدار) الكفار هيعرفوا ، آه ، هيعرفوا النصر لمين ، (عقبى الدار) عقبى الدار للمؤمنين و للموحدين في الدنيا و الآخرة .

{وَيَقُولُ الَّذِينَ كَفَرُوا لَسَتْ مُرْسَلًا قُلْ كَفَىٰ بِاللَّهِ شَهِيدًا بَيْنِي وَبَيْنَكُمْ وَمَنْ عِنْدَهُ عِلْمُ الْكِتَابِ} :

(و يقول الذين كفروا لست مرسلًا) مع كل نبي (لست مرسلًا) يعني إنت مين إنت؟؟ إنت أحسن مننا في إيه؟؟ إنت واحد زينا ، صح؟ بتاكل و بتشرب ، صح؟؟ مين إنت؟؟ هي دي نفسية الكفار دايمًا ، (قل كفى بالله شهيداً بيني و بينكم) إسألوا الشاهد ، مش إحنا دايمًا كنا بنقول كده ، إسألوا الشاهد ، مين الشاهد؟؟ الله هو الشاهد ، إسألوه هيجيبكم ، إسألوه هيجيبكم ، إسألوا الشاهد ، إسألوا الله عن هذا النبي ، هيقول لكم ، (قل كفى بالله شهيداً بيني و بينكم) و مين تاني؟؟ (و من عنده علم الكتاب) ، (و من عنده علم الكتاب) لها معنيين ، يعني الله شهيد ، شاهد بيني و بينكم ، و أيضاً من صفاته إيه؟ عنده علم الكتاب ، علم الرسالة ، وحي الرسالة ، علم يعني وحي ، الكتاب أي الرسالة ، إسألوا الله ، اللي هي صفاته إيه؟ شهيد ، الشاهد ، و عنده علم الكتاب ، من صفاته الثانية : إن هو عنده علم الكتاب ، كذلك (و من عنده علم الكتاب) اللي هم أهل الكتاب ، اللي هم إيه؟ اليهود و النصارى ، عندهم خلفية و تجربة مع الأنبياء فإسألوهم ، طبعاً الخطاب هنا لكفار قريش اللي هم الوثنيين ، ماشي؟؟ .

و اختتم نبي الله الجلسة المباركة بقوله المبارك :

هذا و صلّ اللهم و سلم على نبينا محمد و على آله و صحبه و سلم ، سبحانه اللهم و بحمدك ، أشهد أن لا إله إلا أنت ، أستغفرك و أتوب إليك .

و الحمد لله رب العالمين . و صلّ يا ربي و سلم على أنبياءك الكرام محمد و أحمد و يوسف بن المسيح صلوات تلو صلوات طيبات مباركات ، و على أنبياء عهد محمد الآتين في مستقبل قرون السنين أجمعين . آمين .  

تم بحمد الله تعالى .